

KISIKA MOSI

KAKA YA KUSAMBILA

YINA NZAMBI ME PESA

 Mbote! Kiese na kuvwanda awa na suka yayi. Mpe beto ke na kiese, beto ke yangalala na mbundana yayi ya nene pene-pene ya bankunga yayi ya ntama ya lukwikilu. Beto zola yawu. Beno ve? Refrain *Amen*. Ya kele yina Yandi kele, Amen, beno me mona. Yandi kele na ndinga ya nsuka na kutuba.

² Mu vwandaka ya kuvwanda kuna ke solula na nkundi ya munu ya ntama, Mpangi Brown, na yina ba vwandaka yimba bankunga. Mpe yandi tubaka, “Mpangi Branham, mu me monaka ntete ve tii mazono, yina nge vwandaka zonzila.” Yandi tubaka, “Kana bantu lendaka kota na yina nge ke na kutuba,” yandi tubaka, “konso kima yina ke kanga nzila ba ke katula yawu na nzila.” Ya kele kaka kieleka. Ya kele kieleka. Ya kele kaka kieleka. Kana beno lendaka kaka kubakula Yawu, lendaka simba Yawu. Beno me mona?

³ Na kuzonzaka na mwa nkundi ya munu, Ernie Fandler. mu banza ti bayankaka na kati ya beno yina ke kuwa na alo-aloo ke bambuka moyo na Ernie, mutindu yandi ndimaka, mutindu ba twadisaka yandi na Mfumu. Yandi ke zonzaka ve Kingelesi ya mbote, to mu ke zola ti yandi kwiza kutuba mpova mosi. Mpe yandi ke vukisaka ba-*V* mpe ba-*W* ya yandi. Yandi vwanda yufula munu kana mu ke bambuka moyo na ntangu yina, ya vwandaka na Shawano, kisika yandi ke zingaka. Bakala yango kufwaka na lukutakanu, yandi kubwaka na kitu ya yandi, ya kufwa, Lutherien. Beto nyonso vwandaka swi. Mu zonzaka Ndinga ya Mfumu na zulu ya yandi, yandi vutukaka na luzingu, mpe vutukaka mbala mosi na kisalu. Um-hum. Ba me zimbanaka yawu ata fioti ve, ba ke zola ti beto vutuka dyaka.

⁴ Mu me bakula ti na France, na suka yayi, ya kele kulutila bantu mafunda zole ya France ke na kumanga kudya bilumbu mingi, samu beto kwenda na kunata Nsangu na France, na France, yinsi ya muvimba ya ba-Protestant, ndambu ya ba-Protestant ya yinsi kele ya France. Mpe na yawu beto kele . . .

⁵ Ya me banda kaka na kubasisa bafelele ntangu yayi, ya ke na kubanda kaka, mpusu ke na kukatuka samu ti blé kubasika kuna ntangu yayi. Beno me mona? Na yawu beno vwanda kaka na buzitu, beno landila na kusambila. Beno me mona? Beno

bambuka moyo, "Bayina ke tulaka ntima na Mfumu, ke vutula ngolo ya bawu."

⁶ Ntangu yayi, ya kele... Mu vwandaka... mu me banda na kununa, mu banzaka, "Mu ke... Ya ke vwanda na reveil yankaka, mu ke mona ntangu yankaka?" Mpe beno bambuka kaka moyo, na wesete ke kwiza munati-mpunda ya mpembe. Beto ke tambula diaka na nzila yayi. Ya kieleka. Ntangu beto ke kubama. Ya kele nsilulu, beno me mona.

⁷ Ntangu yayi, mu zola tuba na Mpangi Leo... Mu vwandaka zonzila Mpangi Wood mazono na nkokila, mpangi ya yandi ya bakala vwandaka awa. Mpangi Leo, kana nge na mwa kimvuka yina ke na kulandaka na alo-aloo kuna na suka yayi, Mpangi-kento Mercier, tata ya nge kele awa. Mu monaka yandi mazono na nkokila. Yandi kele awa na kati ya kivinga kisika mosi kuna, mpe yandi ke talana mbote mpe na mavimpi ya mbote.

⁸ Na suka yandi belukaka na tabernacle, ya vwandaka na bantu zole na cancer ya nene, bayina vwanda kufwa ya kieleka, mpe bawu zole belukaka. Mpe tata ya yandi, kiboba ya bakala yina kuzwaka kukangamaka ya ntima, yandi belukaka samu na nkembo ya Nzambi. Mpe yandi kele na kati ya lukutakanu awa kisika mosi kuna. Mu lenda mona yandi ve na kati-kati ya bantu ntangu yayi, kasi yandi vwandaka awa mazono na nkokila.

⁹ Mbote na beno nionso kuna bisika nionso na kati ya yinsi; awa na kisika yayi ya mbote, ya Life Tabernacle awa na Shreveport, na nkonga ya bantu ya kufuluka na bantu samu na lukolo ya Lumingu. Beno zaba, kana mu vwandaka zinga na Shreveport, na kutubaka ve kima mosi samu na kutelemina mutunu mosi, kasi yayi ke vwanda kisika yina mu ke kwiza na dibuundi, kaka awa na Life Tabernacle. Yayi kele ve denomination. Life Tabernacle, kele bubu yayi, kele tabernacle yina ke yambaka bantu nionso. Bawu basikaka na denomination samu ti bawu ndimaka munu mpe Nsangu yayi mu ke longaka. Mpangi Jack Moore, mpangi ya munu ya bakala mpe nkundi ya munu, ba katulaka yandi na denomination samu yandi vwandaka kintwadi na munu. Mpe na yawu mu banza ti yandi fwana kuzwa lukumu mosi. Ya kele kieleka. Nzambi sakumuna yandi. Mpe beno bambuka yandi na kisambu, mpe beno kwikila na yandi.

¹⁰ Mpe ntangu yayi Mpangi-kento Moore, mu ke mona yandi kisika mosi ve, yandi, yinga, na manima awa, yandi ke monana mutindu mwa mwana ya kento ya kuvwanda kuna na suka yayi, yandi me lwata bilele ya kitoko, ya malu-malu, na yayi, ya ke monana mutindu lele ya Paki. Mpe ya ke monana... Mpangi Jack zabaka yandi ve. Ntangu yayi, ntangu yayi Mpangi-kento Moore!

¹¹ Beto ke kondwa mingi Anna Jeanne mpe Don, mpe bantu yankaka yina. Kiese na kukutana na Mpangi Nolan,...mosi ya

bankundi ya kisalu awa.

¹² Mpe Mpangi Ernie, mu yufulaka yandi mazono kana yandi ke yimba mukunga yayi *Amen*. Mu kele na yawu na bande, mpe mu me bebisa yawu samu mu ke kuwaka yawu mingi, *Amen*. Mu banza ti yandi kele na ndinga samu na yawu; ya kele mbote mingi kulutila nionso yankaka. Mpe Judy ya ntwenya, mu talaka yandi; bawu zole, bawu ke talana kaka mutindu mpangi ya bakala mpe mpangi ya kento. Mutindu yina ve? Bawu kele bakala mpe kento ya makwela. Beno tala mosi na mosi ya bawu, beno me mona, na yina bawu kele ya kufwanana mingi. Beno me mona? Mpe bawu kele kieleka mwa bankwelani ya kitoko. Ya kele, beno zaba, ya kele... Mpangi Palmer yina me mata bimatinu ya wolo, ya kele mwana ya yandi ya kento mpe bokilo ya yandi ya bakala. Mpe ya kele... Ya kieleka yandi kele mbandu ya mbote ti yandi me sansa mbote bana ya yandi. Mpe yandi kele na bayankaka mpe, yina me kwelaka milongi mpe, mpe bayayi kele ba-évangéliste mpe bawu kele na bilanga ya kisalu, mpe bayankaka. Na yina ya kele kaka mbote mingi.

¹³ Mu me monaka ve Mpangi-kento Palmer. Ya kieleka, mu zaba ve kana mu ke zaba yandi kana mu me mona yandi, to ve. Yandi kele, mu banza, kisika mosi kuna (ya kieleka) na lukutakanu. Kuna na manima; Nzambi sakumuna nge, Mpangi-kento Palmer.

¹⁴ Ntima ya munu kele na mpasi ntangu nyonso mu ke banza na yawu. Mpangi Palmer me mata kaka bimatinu kasi na mwa minuti fioti, mu me kuzwa nsangu ti yandi me kwenda. Mu vwanda kwikila yawu ve. Billy bokilaka munu, mpe muntu mosi bokilaka... mpe bawu zabaka. Beto vwandaka bankundi ya luzolo mingi, mpe kuzaba ti yandi me kwenda, kieleka ya vwandaka mpasi. Kasi beto nyonso fwana kwenda, ata nani beto kele, beto fwana kwenda mosi na mosi. Kasi ya kele kaka na kima mosi, “Beto kuwa nsuka ya dyambu: Beno vwanda na boma ya Nzambi mpe beno zitisa misiku ya Yandi, samu ti yayi kele kisalu ya muvimba ya muntu,” Ecclesiastes 12.

¹⁵ Ntangu yayi, mu ke na ntangu mingi ve samu na leso yayi ya lukolo ya Lumingu, mpe ndinga ya munu me kangama.

¹⁶ Beno tuba, Mpangi Pearry Green me sala kima ya mbote. Yandi me kuwa munu kutuba, mazono na nkokila, “Mu zolaka vwanda na mwa postiche ya munu samu na kukeba munu...” Yandi bokilaka kuna mpemekaka na kuzwa muntu mosi samu na kunatina munu yawu na pepo. Mu tubaka, “Nge lutisaka ntangu mingi, ndinga ya munu me kangama yimeni.” Mu me meka bamvula mingi samu na kuzwa mvutu, kasi ntangu mu kuzwaka yawu, yawu pesaka mvutu na diambu. Kasi mu me zimbana yawu mbala yayi, na yina ndinga ya munu me kangama fioti. Na yina beno vibidila munu, kana beno zola, ntangu mu ke longa.

¹⁷ Ntangu yayi, bantu yikwa ke zolaka lukolo ya Lumingu? Oh, la la, ya kele kieleka. Ya kele kima ya mbote na kufidisa bana ya beno. Ve, beno bika mu sungika yawu, kima ya mbote kele *kunata* bana ya beno. Ya kele kieleka, *kunata* bana ya beno; beno kwiza mpe. Bantu yikwa zaba kisina ya lukolo ya Lumingu ya beto? Wapi kisika ya bandaka? Na Angleterre. Yinki ba vwandaka bokila yawu ntete? *Lukolo ya bampatu.* Ya kele kieleka, ba vwandaka bokila yawu “lukolo ya bampatu.” Na yina mu me zimbana nkumbu ya bakala yango yina me bandaka yawu. Yinki vwandaka nkumbu ya yandi? [Muntu mosi me tuba, “Robert Raikes.”—Mu.] Ya kieleka, ya kieleka mutindu yina. Mpe yandi kuzwaka bana ya fyoti na bala-bala (bayina vwandaka bampatu, mpe bayina vwandaka ve na kisika ya kukwenda, mpe bayina vwandaka yimbi mingi), mpe yandi kotisaka bawu mpe bandaka na kupesa bawu baleso na zulu ya Biblia. Mpe ya me kuma mosi ya bantumunu ya kulutila nene ya dibuundu, na kutala, bubu yayi, lukolo ya Lumingu. Ya kele mbote na kukwenda. Beno vwanda na kivuvu na kukwiza, beno nata bana ya beno. Mu banza ti tabernacle awa kele na milongisi, na bivinga ya kulunga, landila bamvula, mpe nyonso yina. Mpe beno bandimi ya malu-malu yina ke na kwiza kaka na Klisto, beno landa kaka Nsangu; beno kwiza awa na Life Tabernacle, mpe ya ke sala beno mbote.

¹⁸ Ntangu yayi, na nkokila yayi beto ke vwanda na ndonga ya bisambu ya mutindu ya ntama. Beto ke sambilakaka samu na bambevo mutindu beto vwandaka sala, Mpangi Jack mpe Mpangi Brown.

¹⁹ Mu ke bambuka moyo ti mu me mona Mpangi Brown ke meka na kukabula bakalati yango ya bisambu, mpe wapi mutindu yandi mosi kele longi, mpe na bilumbu yina, na organisation yina vwandaka, bantu, vwandaka pusa yandi, beno zaba, “Mu—mu kele mpangi ya beno ya bakala mpe beto kele kintwadi,” beno zaba, “beno fwana sadisa munu na kuzwa kisika kuna.” Oh, ya kieleka yandi vwandaka na ntangu mosi ya mpasi, kasi yandi vwandaka kaka ya kwikama mutindu ya lendaka vwanda. Mpangi Brown kele bakala mosi ya mbote. Mpe na yina beto zola yandi.

²⁰ Mpe mutindu mu ke mona beto nionso, na kati ya beto tatu, beto ke na kununa, beto ke na kukuma biboba, na nsuka. Ya ke vwanda kima mosi ya kiadi mingi kana beto me tula ve na kati ya beto kima yina ya nene, yina beto zaba kele Kieleka. Beto ke na kukubama na kuvutuka na mosi ya bilumbu yayi, na kuvutuka diaka na buntwenia ya beto, ata mbala mosi ve...banzutu ya beto ke soba, ya ke kuma mutindu ya Yandi. “Samu ti ntangu tabernacle yayi beto ke zingaka na zulu ya ntoto ke zimbana, ya kele na mosi ke vingila kuna.”

²¹ Mpe kitini ya yawu beto fwana vutula matondo, bankundi ya luzolo, ti Mfumu Yesu ya luzolo... Beno yina ke tulaka kivuvu na munu ti mu ke tuba na beno Kieleka; Mfumu Yesu ya luzolo, na

suka mosi pene ya ngunga nana, bikaka ti mu mona Yinsi yina. Ntangu yayi, ya vwandaka ve—ya vwandaka ve vision, to, mu zola ve kutuba mutindu yina. Ata nyonso yina ya vwandaka, ya vwandaka kaka kieleka mutindu mu ke na kuzonza na beno awa. Ntangu yayi, mu monaka bizizi ya bantu yina, mpe mu lendaka ve kuzaba bawu, ba vwandaka me vutuka diaka ntwenia. Mpe bawu vwandaka kaka kieleka mutindu... Mu vwanda simba maboko ya bawu mpe nyonso. Kaka kieleka...

²² Mpe ya sadisaka munu, samu mu vwandaka na dibanza mosi, ntangu muntu mosi kufwaka, moyo ya yandi kaka kwendaka. Kasi na yina ntangu Yandi tubaka yawu na munu, ti “Kana tabernacle yayi ya ntoto kisika beto ke na kuzinga me... beto kele yimeni na mosi.” Beno me mona? Mpe beto fwana kuzwa nyonso na kati ya butatu, samu na kusala kulunga. Beno me mona? Mpe ya kele na nzutu mosi awa, na manima nzutu kuna yina kele nzutu ya mazulu, mpe na manima nzutu ya nkembo na mvumbukulu. Beno me mona, yina ke sala ti yawu vwanda ya kulunga. Beno me mona? Na yawu ya kele... Ya kele disolo ya luvunu ve, ya kele dibanza ve, ya kele mpeve ve. Ya kele bakala mpe kento mutindu beno kele, ya kieleka.

²³ Mpe kuna, bamvula me luta, mu monaka bizunga ya bantu ya kuzimbana, mpe mu vwandaka kuna. Mu ke tuba na beno, bankundi, mutindu kiboba ya bakala, bika mu ndimisa beno yayi, bisika nionso na yinsi na suka yayi, beno zola ata mbala mosi ve kutala kisika yina. Ya kele ve ata fioti na mutindu yina mu lendaka... kana mu vwandaka artiste na boloso mu lendaka ve kufikula foto yango. Mutindu longi, mu lendaka tendula na beno ve. Beno ke tuba ti difelo kele kisika yina ke na kupela, ya kele kulutila yina bambala mafuku, boma yina ke tambula na yawu.

²⁴ Mpe Mazulu, to, kisika yayi, kisika nyonso ya vwandaka, mu zaba ve wapi mutindu kubokila yawu. Yandi talisaka na yawu kuna mutindu “mioyo na yisi ya autel.” Kasi ntangu ya vwandaka, ata fioti mu me... Ya kele ve na mutindu ya kutendula wapi mutindu nene ya kele. Ya kele... Ntangu yayi, beno fwana baka kaka ndinga ya munu, mu kele kaka muntu. Beno me mona? Kasi ba-vision yayi yina ke salamaka ntangu nionso mutindu kaka mu tubaka na beno, mpe beno zaba ti yawu nionso vwandaka kieleka, *yayi* kele kieleka mpe. Nyonso yina beno ke sala, kana beno kondwa nyonso yankaka (mavimpi, ngolo, meso ya beno, mbote nyonso yina ya kele), beno kondwa Yawu ve. Ya kele ve na kima yina lenda fwanakana na yawu. Ya kele... Ya kele ve—ya kele ve na ndinga na ndinga ya Kingelesi, yina mu zaba, yina lenda tuba yawu. Kana beno ke tuba “ya kulunga,” ya kele na zulu ya yawu; “ya kitoko mingi,” ya—ya kele na zulu ya yawu; “kitoko mingi,”... Ya kele ve—ya kele ve na bampova yina mu zaba ti ya lenda tuba yawu, samu ti ya vwandaka mutindu yina... Mpe na yina, kubanza, yina kele ve

nsuka ya yawu dyaka. Mu banzaka, “Mu ke vwanda na boma ya kukuma na yayi?”

²⁵ Mu tubaka, “Beno ke kudiaka?”

²⁶ Yandi tubaka, “Awa ve. Beto ke kudiaka ve awa, kasi ntangu beto ke vutuka na ntoto beto ke kuzwa nzutu yina beto ke kudia.”

²⁷ Mbote, mu lendaka kuwa bawu. Ba vwandaka kaka mutindu *yina*. Beno me mona? Mpe bawu... Mu tubaka, “Mbote, beno me...” Oh, yinga, bawu kele na nzutu. Ya kele kaka disolo ya luvunu ve, ya kele nzutu. Beto zabana mosi na yankaka. Bawu nionso zabaka munu, ba vwandaka yamba munu, mafuku na kati ya bawu.

²⁸ Mpe mu tubaka, “Mbote, mu zola mona Yandi Yina nataka munu awa.”

²⁹ Yandi tubaka, “Nge lenda mona Yandi ve ntangu yayi, nge fwana vingila.”

³⁰ Mu tubaka, “Samu na yinki nge me tula munu... awa na zulu?”

³¹ Yandi tubaka, “Nge vwandaka ntwadisi na luzingu.”

³² Mpe mu tubaka, “Nge zola tuba ti bawu nyonso kele ba-Branham?”

³³ Yandi tubaka, “Ve! Yina kele bandimi ya nge yina nge nataka na Klisto.” Beno me mona?

³⁴ Mu talaka na nziunga, mpe na yina bankokila nionso ya mpasi, mpe bakumekama, zimbanaka, ntangu mu lendaka mona bizizi ya bawu. Kento mosi ya ntwenia kwendaka mbangu kuna, mosi ya bakento ya kulutila kitoko, mpe yandi losaka maboko ya yandi na nkingu ya munu, mpe yandi tubaka, “Mpangi ya bakala ya ntalu.” Mpe ntangu yandi lutaka... Ntangu yayi, yandi vwandaka kento. Na yawu... Kasi na kati kuna, ya ke vwanda ata mbala mosi ve na disumu. Beno me mona, ba-glande ya beto me soba kuna. Bawu ke sansa dyaka ve bana, kuna. Beno me mona? Beno me mona, bawu nyonso mutindu mosi.

³⁵ Yinki ke salaka luswaswanu, sensation. Ya kele samu na yina mu ke kwikilaka ve na kubina na piste. Ata bakala mosi ve... Munu, na ntwala ya Nzambi mpe Biblia ya munu, mu zingaka ya kutsyema, mutindu yina na luzingu ya munu nionso ntangu mu vwandaka mwana ya bakala ya ntwenya, ntangu mu vwandaka bakala ya ntwenya. Mwana-kento nyonso yina mu me basikaka na yandi, mu lenda telema kaka na Lufundusu na yandi. Beno me mona? Kasi ya kele ve na bakala mosi, mu ke kipe ve nani beno kele, yina lenda bika kento mosi (mutindu kento me salamaka) kukangama pene-pene na yandi; kana beno kele bakala ya kieleka ya mavimpi ya mbote, ya kele na sensation. Kasi kuna ya vwandaka ve; ya kele ve na ba-glande. Beno nyonso kele na glande mosi. Beno me mona? Ya kuvedila, mpangi-kento

ya kukondwa mvindu mpe zola ya kimpangi, ya kulutila ya ke vwanda samu na beno...ata mpe samu na...kuyamba mwana ya beno mosi ya kento. Beno me mona? Mwana ya beno ya kento, kasi ba me salaka yandi...yandi kele kento mpe beno kele bakala. Beno me mona, yawu lendaka vanga kima mosi; kasi Kuna yawu lenda ve, disumu me zimbana, yimeni. Beno me mona? Kieleka...kaka Zola ya kieleka, ya santu.

³⁶ Mpe mu talaka kento yina. Ya vwandaka...ya monanaka ti mafuku ya bawu vwandaka kuna, mpe bawu nionso vwandaka na bansuki ya yinda, mpe bilele ya mpembe ya yinda. Mpe—mpe Yandi yayi yina vwandaka zonza na munu, yandi tubaka, “Nge ke zaba yandi ve?”

³⁷ Mu tubaka, “Ve.”

³⁸ Yandi tubaka, “Yandi vwandaka na bamvula makumi yivwa ntangu nge twadisaka yandi na Klisto.”

³⁹ “Lemvo ya ngitukulu, muningu ya kitoko.” Beno me mona? Ya kele ve mutindu ya kutendula yina ya kele. Beno baka kaka ndinga ya munu kana beno ke kwikila munu. Beno ndima kieleka ti...beno yoka kyamvu nionso ya yinza na manima ya beno.

⁴⁰ Mu ke kwikila ti Dibuundu me banda na kuwa Nsangu, mpe me banda na kubakula. Kasi, bankundi, beno kuwa, beto fwana vwanda na Mvwandulu ya Mwana, beto fwana kuyela. Lukwikilu ya beto—ya beto kele ve ya kuyela. Landila mayela beto ke na kuwa Nsangu yina Nzambi pesaka beto, mpe kumona bidimbu yina Yandi lakisaka beto, mpe na kutalisaka yawu na nzila ya Biblia, ya kele kuna, kasi, oh, mutindu Dibuundu kele na nsatu ya kuvwanda na Mvwandulu ya Yandi tii ya ke kuma ya kulemvuka, beno zaba, ya ke kuma ya lembami na kati ya Mpeve tii kuna ya ke kangama kuna. Bantangu yankaka ntangu ba ke longa Nsangu, beno ke kuma ngolo, beno fwana kotisa yawu mutindu yina, samu ti beno fwana bula ngolo munsoso samu na kukanga yawu ngolo. Kasi ntangu Dibuundu mbala mosi ke kuzwa Yawu, Basolami yina ba me bokila na kubasika mpe yina me kabwana, na yina na kati ya Mvwandulu ya Nzambi, mu zaba ti ya ke vwanda kima mutindu bantu vwandaka Kuna ntangu ba ke baka Yawu na Enlevement.

⁴¹ Mu zolaka tuba na suka yayi na zulu ya *Enlevement*, kasi mu ke na ndinga mingi ve na kusala yawu, mpe na yawu beno vwanda kaka ya kukangama na munu mwa ntangu fyoti, na yina mu zola kuzonza na zulu ya dilongi ya *Kisika Mosi Kaka Ya Kusambila Yina Nzambi Me Pesa*.

⁴² Ntangu yayi, ya kele dilongi ya nene. Na yawu beto sambila ntangu yayi. Mpe bisika nyonso na yinsi na suka yayi, kisika nyonso beno kele, beno kulumusa bayintu ya beno kaka na mwa ntangu fyoti. Beno vwanda kieleka ya kusungama ntangu yayi, beto ke belama na Ndinga ya Nzambi, yina kele Nzambi na mutindu ya mukanda.

⁴³ Nsoniki ya nene ya Buku yayi, "Ya kele Nkuna," ba me longa beto, "ti mukuni me kuna," mutindu me tuba Nsoniki. Ntangu yayi, beto ke bakula ti nkuna ke yela kana ya kele na mutindu ya kulunga ya ntoto. Na yawu, Tata, Nge zola na suka yayi kukatula bansende nyonso mpe matiti ya bansende, mpe kukondwa lukwikilu, mpe mwa mabanza na bantima ya beto; ti Ndinga ya Nzambi ke kula mbote-mbote, yina ba me losila masa na nzila ya Mpeve na kati ya bantima ya beto, samu beto kuma bantu ya Nzambi. Pesa yawu, Tata. Yina kele bantima ya beto. Ve kaka samu na beto yina me zaba yayi, kasi bika ti ya vwanda na bayankaka na kati ya yinsi, konso ntima ya muntu ke na kupela na zola mpe lutondo, ke kwenda samu na kumeka na kununga mpangi-bakala yina me zimbana, mpangi-kento yina me zimbana. Pesa yawu bubu yayi, Nzambi. Beto ke na kutalaka ya muvimba na Nge, samu ti Nge kele Ntwadisi ya beto mpe Mfumu ya beto. Na yawu beto ke sambila ti Nge twadisa beto na Ndinga ya Nge bubu yayi, mpe pesa beto balusakumunu ya Nge. Na lemvo ya Nge mpe na Nkumbu ya Nge beto me lomba yawu. Amen.

⁴⁴ Ntangu yayi, beto baka dilongi ya beto... Mu zola kutanga na Buku ya Deutéronome, Ngwisani ya Ntama, kaka samu na kuvwandisa Masonuku. Mu ke na mwa banoti mu sonikaka na nswalu nionso na manima mu me vutuka na madia ya suka na Mpangi Vayle.

⁴⁵ Ata mbala mosi ve ti mu me vutulaka matondo na bakala yina kuna na hotel yina...na restaurant yina na nkokila yina, yina futaka samu na—samu na madya ya beto ya nkokila. Kento ya munu na munu mpe mwana ya munu ya kento vwandaka kuna, mpe ntangu mu kwendaka kufuta facture ya munu, muntu mosi futaka yawu. Muntu nyonso yina ya vwandaka, mu ke tonda nge. Yandi tubaka, "Bakala yina me vwanda na nsuka ya kiti." Kieleka ya vwandaka na nkonga ya muvimba na kati kuna yina beto zabaka. Ntangu yayi, mu...kima mosi mutindu Kichapoo, kima mosi mutindu yina, kisika yina kuna, restaurant yina beto vwandaka. Matondo na beno, muntu nyonso yina ya vwandaka yina salaka yawu. Mosi na mosi ya beno, Nzambi sakumuna beno.

⁴⁶ Ntangu yayi, na kapu ya 16 ya Deutéronome, ya kele luzitusu ya paki. Na yawu beto zola kutanga na mwa banzila ya ntete, banzila yiya to tanu ya ntete, banzila sambanu awa.

Zitisa ngonda ya Abib, mpe zitisa paki... (Ya zola kutuba "Ngonda ya yiya.")... MFUMU Nzambi ya nge: samu na ngonda ya Abib yayi MFUMU Nzambi ya nge basisaka nge na Egypte na mpimpa.

Nge ke pesa na yawu munkayulu ya paki na MFUMU Nzambi ya nge, ya mameme mpe bibulu na kisika yina MFUMU ke soola na kutula nkumbu ya yandi...

Nge ke kudya dimpa ya kukondwa levire na kati ya yawu; bilumbu sambwadi nge ke kudya mampa ya kukondwa levire, dimpa—dimpa na yina, . . . nge ke basika na yinsi ya Egypte na mbangu: . . . nge lenda bambuka moyo na kilumbu yina nge basikaka na yinsi ya Egypte bilumbu nyonso ya luzingu ya nge.

Mpe ya ke vwanda ve . . . na dimpa ya kukondwa levire na nge na yinsi ya nge nyonso bilumbu sambwadi; to ya ke vwanda ve na kima mosi ya nsuni, yina nge pesaka munkayulu kilumbu ya ntete na nkokila, ya ke vwanda ve mpimpa nyonso tii na suka.

Nge lenda pesa ve munkayulu ya paki na mosi ya mlelo, yina Mfumu Nzambi ya nge pesaka nge:

Kasi na kisika yina Mfumu Nzambi ya nge me sola na kutula nkumbu ya yandi, kuna nge ke pesa munkayulu ya paki na nkokila, na kulala ya mwini, na nsungi yina nge basikaka na Egypte.

Ntangu yayi ti Mfumu kubwela balusakumunu ya Yandi na ntangulu ya Ndinga ya Yandi.

⁴⁷ Ntangu yayi, ndinga ya munu me vwalangana samu na ba-microphone? Mazono na nkokila mu kuwaka ti ya vwandaka mutindu yina. Beno lenda kuwa mbote mingi, bisika nyonso? Beno lenda ve kuwa. [Mpangi Branham ke na kuyidika microphone—Mu.] Ya kele mbote mingi? Ya kele mbote mingi, na kuzonzaka na ba-microphone na yisi mutindu yayi? Ndinga ya munu me kangama fioti, na yina mu me telema pene-pene na suka yayi samu na lukanu yina, mpe mu banza ti Mpangi Pearry lenda—lenda basisa yawu kuna. Beno lenda kuwa yawu mbote mingi ntangu yayi? Mu banza ti ba me yidika yawu. Mbote mingi.

⁴⁸ Ntangu yayi, ki- . . . Kima yina mu zola kuzonzila na suka yayi ya kele ti Nzambi kele kaka na kisika mosi yina musambidi lenda kutana na Nzambi, kaka kisika mosi. Na kati ya bansungi bantu mingi sosaka kisika yayi yakinsweki ya Nzambi, na kati ya bansungi nionso. Mpe Job zolaka kuzaba kisika Yandi vwandaka zinga, “Kana mu lendaka kaka kukwenda na yinzo ya Yandi mpe kukonkota na kielo ya Yandi.” Job zolaka kuzwa kisika ya kuzinga ya Nzambi, samu ti kuna Nzambi mpe dibuta ya Yandi ke sambilaka kintwadi.

⁴⁹ Mutindu mazono, na nsangu ya mazono na suka, beto ke mona ti ya kele na lenda samu na muntu na kusambilila Nzambi na mpamba, na kusambilila ya kieleka. Nzambi kele na bima nyonso yayi ya kukubika samu na beto, kasi kima ya yawu kele, beto fwana sosa kisika yawu kele. Paul tubaka na Timothée na kusosa, mpe ya—ya vwanda na nsungi mpe na nsungi ve, ti yandi vwanda ya kukubama samu na kupesa ndinga to . . . kivuvu yina vwandaka na kati ya yandi.

⁵⁰ Ntangu yayi, bima nyonso yayi kele na kati kuna. Mpe beto ke tala . . . Ntangu yankaka mu ke zola kukwiza na Shreveport kisika beto ke lutisa kaka pene ya basabala zole to tatu kaka samu na kubaka baminuti makumi tatu na nkokila mosi mpe samu na malongi, beno me mona, beno bikana kaka na kati ya Ndinga, masonuku yayi yakinsweki, beno me mona, kisika beto lendaka mona wapi mutindu kukota. Mpe beno tala kaka mbote, beno landa lutwadusu ya Nzambi, ya kele kaka na fungula mosi na mwelo nyonso. Ya kele kieleka. Mpe ata fungula yankaka ve, ata ti ya ke monana mutindu yina, Nzambi kele ve na fungula ya bisika nionso; ya kele kaka na fungula mosi. Mpe ntangu yayi, beno fwana vwanda na fungula yina, to kielo ke zibuka ve. Ata ti beno kele ya kusungama, beno lendaka ve kuzibula kielo yina.

⁵¹ Ntangu yayi, bantu yikwa vwandaka na madia ya suka ya mazono, na suka yina? Mbote mingi, mu banza bantu mingi, na kutala makumi yivwa na zulu ya nkama na kati ya beno, to kulutila. Samu na kupesa dibanza na yayi, yina mu ke tuba, David vwandaka ntinu yina ba me pakula (yina ba me pakula na Nzambi), ntinu ya kulutila nene yina Israel me kuzwaka ntete ve, na nganda ya Mfumu Yesu (yina kele Nzambi) Mupakulami Mosi. David kele mwana ya Yandi, to, Yesu vwandaka Mwana ya David landila dikanda, na nsuni. Mpe Yandi ke vwanda na zulu ya kiti ya kimfumu ya David mutindu kilandi, mutindu ntinu ntangu nyonso ke byadilaka kiti ya kimfumu ya ntinu.

⁵² Beno tala, ntangu yayi, ti David na kuvwandaka mupakulami, kasi na kupakulama yina yandi kuzwaka, yandi basikaka na luzolo ya Mfumu na kupakulama yina; mpe bantu nionso, bakaka ve mutindu ya Masonuku to fungula ya luzayikisu yayi, bawu nionso vwandaka ya kupakulama mpe, bawu nyonso, kintwadi, vwandaka boka mpe vwandaka kembisa Nzambi samu na kima yina vwandaka monana kaka kieleka: kuvutula Ndinga ya Nzambi na yinzo ya Nzambi. Kasi David vwandaka ntinu, profete ve. Beno me mona? Yandi . . . Ya vwandaka na profete na yinsi yina samu na kusala yawu, mpe Nzambi ke zitisa ve mouvement nionso samu ti ba me sadilaka ata fioti ve fungula ya kieleka. Kielo zibukaka ve. Mpe ntangu yayi beto fwana bambuka moyo na yawu, mpe kusimba yawu na dibanza. Ya kele . . . Bima nyonso ya Nzambi, fwana salama na mutindu yina ba me kukubika, mpe yina ke sukisa dyambu. Ntangu yayi, kuna Nzambi kele na Dibuundu mosi na yina Yandi ke kutanaka na bantu, mpe Yandi ke yamba beno na kati ya Dibuundu yina mpe na dibuundu yankaka ve.

⁵³ Mu tubaka yayi samu ti ba me bakula munu yimbi bambala mingi, mpe bantu me tubaka na munu . . .

Mu ke tuba, “Nge kele Muklisto?”

“Mu kele Baptiste.”

“Nge kele Muklisto?”

“Mu kele Methodiste.”

“Nge kele Muklisto?”

“Mu kele Pentecotiste.”

⁵⁴ Ntangu yayi, beno me mona, yina zola tuba kima mosi ve na Nzambi. Beno ke na kumeka kaka fungula ya yimbi. Kasi ya kele na fungula ya mbote, ya kele na mosi kisika Nzambi... Nzambi silaka ata fioti ve na kukutana na beno mutindu Methodiste, to mutindu Baptiste, to Pentecotiste, to denomination yankaka ve. Yandi ke talaka ve ba-denomination, bawu ke teleminaka Yandi.

⁵⁵ Samu na Nsangu yina ya yinda, mu ke longa Yawu na tabernacle ntama mingi ve. Mpe kuna Mpangi Jack ke kuwa Yawu, mpe kuna beno lenda mona yina beno zola kusala samu na Yawu, samu ti ba ke kanga Yawu na bande.

⁵⁶ Ntangu yayi, bantu ke salaka mutindu ti Nzambi me tumama kaka na ngolo na kukutana na bawu na lufulu ya théologie ya bawu. Ntangu yayi, bantu ke salaka mutindu yina. Ba ke vukanaka ve na mosi na yankaka. Butatu ya Pentecôte ke vukana ve na ba-Unitaire, to ba-Unitaire ke vukana ve na ba-Trinitaire. Ba-Méthodiste ke vukana ve na ba-Baptiste, samu ti mosi kele muntu ya misiku mpe yankaka yina kele Calviniste, na yawu bawu kele na kubundana ata fyozi ve. Mpe bawu ke balula mabanza ya bantu na ziunga ya yimbi mingi ti bawu ke telemina mosi na yankaka.

⁵⁷ Mu kwendaka sambila, mwa ntangu fioti me luta, na kivinga mosi ya lupitalu. Ya vwandaka na mama mosi ya kulala kuna ya kubela mingi, yina zolaka luta na lipaso, ba vwandaka vingila yandi kufwa. Mama yankaka yina vwandaka ya kulala kuna (ba bokilaka munu na kusambilna samu na yandi.), mu tubaka na yandi, “Ya ke yangisa nge kana mu sambila na mwa ntangu fyozi?”

⁵⁸ Mpe yandi tubaka, “Beno benda rido yina!”

⁵⁹ Mpe mu tubaka, “Lemvokila munu.” Mu tubaka, “Mu zolaka sambila kaka.”

⁶⁰ Yandi tubaka, “Beno benda rido yina!”

⁶¹ Mu tubaka, “Yinga, mama.” Yandi mpe mwana ya yandi ya bakala vwandaka kuna, *Ricky* mosi ya fioti ya mumesanu. Mpe mu tubaka, “Mbote, nge kele ve Muklisto?”

⁶² Yandi tubaka, “Beto kele Methodiste!”

⁶³ Mu tubaka, “Mbote, mu me yufula nge mutindu yina ata fioti ve, mu me yufula nge kana nge vwandaka ‘Muklisto.’” Beno me mona?

⁶⁴ Mpe na yina yandi tubaka, “Beno benda rido yina!”

⁶⁵ Beno me mona, samu ti muntu yina vwandaka ve Methodiste zolaka sambila samu na kento yina vwanda kufwa, yina yandi vwandaka mpe. Kasi samu ti yandi vwandaka ve ya kuvukana

na organisation ya yandi, yandi vwandaka zola ve kuwa yawu to vwandaka ve na kima ya kusala na yawu. Kana ya kele ve Pharisienne, mu me monaka ntete ve mosi!

⁶⁶ Beno vingila tii beno ke kuwa *Nzila Ya Nyoka*. Huh. Mbote mingi. Ntangu yayi, beno banza ntangu yayi ti denomination ya bawu kele kaka yina me ndimama na Nzambi: “Nzambi ke kuwa beno ve kana ti beno kele Methodiste, to Baptiste, to Trinitaire mosi, to Unitaire mosi,” to kima mutindu yina. Ya kele luvunu!

⁶⁷ Mpe yina kele lukanu ya munu; kasi kana ya kele na nsatu mosi na mabanza ya bantu mpe bantima na kuvwanda ya kusungama... Mu ke kwikila ve ti kento yina salaka yawu samu... to muntu nyonso yankaka. Methodiste lendaka telema ve mpe kusimbisa dibuundu ya ba-Methodiste samu yandi—yandi zabaka ti ya vwandaka yimbi. Muntu yina ke banzaka ti ya kele kieleka. Mu ke kwikilaka ve ti Trinitaire ke fundisa ba-Unitaire, to Unitaire, Trinitaire, ba-Pentecotiste, samu ti yandi zola kuvwanda ya kuswaswana, yandi ke banza ti yandi kele ya kusungama, mpe beno fwana zitisa mabanza ya yandi. Beno zaba, ya ke kwenda na balweka nionso zole. Kasi, beno bambuka moyo, na nyonso yina, kana ya kele na kima na ntima ya bakala mosi to na ntima ya kento mosi ti bawu kwikilaka ti ya kele “kieleka,” na yina ya fwana vwanda kisika mosi ya kele kieleka. Mutindu mu ke tubaka yawu bambala mingi, “Ntangu mudindu ke bokila mudindu, ya fwana vwanda na mudindu samu na kupesa mvutu na lubokilu yina.”

⁶⁸ Beno zaba, ba tubaka na beto ti—ti kidimbu mosi ntete tambulaka na zulu ya kumu ya—ya mubu, na makulu. Kasi ntangu yayi yandi kele ve na makulu, yawu me kituka bipeki samu ti yandi lendaka... vwandaka na nsatu ya bipeki ntangu yandi katukaka na ntoto, kibulu ya mika mingi, samu na kukwenda na mubu; yinza sadilaka yandi bipeki na kisika ya makulu, samu ya lendaka saya kulutila kutambula.

⁶⁹ Mu lenda banza ve na muntu ya nene yayi ntangu yayi yina kwendaka na Pôle ya Sude. Yinki vwandaka nkumbu ya yandi? Byrd. Ba ke tubaka ti yandi salaka bakazaka samu na bibulu, na kutalisa yayi; yandi nataka kibulu samu na kuzwa miliki. Mpe yandi salaka bakazaka ya mika samu na kukeba kibulu na kufwa na madidi. Kasi ntangu yandi kumaka kuna, bawu vwandaka ve na nsatu ya kazaka ya mika, yinza yelaka na yawu. Beno me mona? Samu na yinki? Ntete ya vwanda na kipeki na mukongo ya mbisi, ya zolaka vwanda na masa samu na yandi na kusaya to yandi zolaka ata mbala mosi ve kuzwa kipeki. Kuna... Ntete ya vwanda na yinti yina ke kuyela *na kati* ya ntoto, ya zolaka vwanda na ntoto ntete samu na yawu na kuyela, to ya zolaka vwanda na yinti ve.

⁷⁰ Na yawu, beno me mona, ntangu nyonso yina ya kele na kima na kati ya ntima ya muntu yina ke na kubokila kima mosi, ya

fwana vwanda na kima mosi kuna samu na kupesa mvutu, samu na kusepelisa lubokilu yina.

⁷¹ Kento mosi... Ba salaka autopsie awa ntama mingi ve na zulu ya kento yina kufwaka. Mpe ya kele samu na yina, bawu—bawu tubaka, yina kufwaka yandi, yandi vwanda kudya kaka ntangu nyonso matungulu, ntangu nyonso. Kana yandi vwandaka ve kudia matungulu, yintu ya yandi zolaka sala yandi mpasi, mpe nionso; ba lendaka ve kuzaba diambu ya yawu. Na yina na ntangu ya autopsie, ba monaka kivimbu na kento, ya mutindu mosi ya ba-cellule; ba vwandaka na nkumbu samu na yawu. Mpe ba lendaka baka kivimbu yina mpe kutula yawu na kati ya bolu ya matungulu, mpe ba nienisaka matungulu na kati ya mpimpa. Beno me mona? Yinki ya vwandaka? Ya vwandaka kima mosi na kati ya kento yina vwandaka bokila samu na matungulu, mpe kana ya vwandaka ve na matungulu ya zolaka vwanda ve na kivimbu.

⁷² Na nzonzolo yankaka, ya fwana vwanda na Mvangi ntete, ntete ya vwanda na kivangu. Beno me mona?

⁷³ Ntangu yayi, kana na kati ya ntima ya muntu ya kele na nsatu... Mutindu ba-Methodiste, ba-Baptiste, ba-Presbytérian, na ba-Catholique, bayankaka yayi nionso, ke meka na kuzwa nzila yina ya kieleka, mpe ba me tuba na bawu na nganga-Nzambi ya bawu mpe ba-pasteur ya bawu, mpe nyonso yina, ti, “Yayi kele nzila ya kieleka.” Bawu ke tuba, nganga-Nzambi ke tuba, “Ya kele ve na mpulusu na ngaanda ya dibuundi ya Katolika.”

⁷⁴ Mbote, konso dibuundi ke bakaka ya yandi... dibanza ya bawu mosi. Bayankaka na kati ya bawu ke ndimaka yawu ve, kasi bawu ke salaka yawu na nzila ya kisalu ya bawu. Kisalu ya beno ke zonzaka mingi kulutila ndinga ya beno. Ya kele kaka... Na mutindu yankaka, ba kele kaka ya kulutila luvunu ti Katolika kele. Katolika ke funguna yawu mbala mosi, “Mu ke kwikila ti yayi kele kima mosi kaka,” kasi bawu ke sala yawu ve. Ba ke bumba yawu, kasi bisalu ya bawu ke talisa yina ba ke na kubanza. Beno me mona?

⁷⁵ Ntangu yayi, ya fwana vwanda na kisika mosi kuna, samu ti ya kele na nsatu na kati ya ntima ya muntu samu na kumona yawu. Mpe mu banza ti Ndinga ya Nzambi kele na mvutu samu na nyonso yina kele nsatu ya beto. Na yawu Nzambi kele na mvutu, mpe beto longuka yawu ntangu yayi na kati ya Masonuku. Mpe kuna kana Nzambi ke lakisa beto na nzila ya Masonuku kisika mosi kaka, kisika kaka (dénomination mosi kaka, kana ya kele mutindu yina), mutindu mosi kaka yina Nzambi ke kutana na muntu, na yina beto ke kangama na yawu beto talaka Kieleka ya Biblia, yina Yawu ke tuba.

⁷⁶ Ntangu yayi, mpova *Deutéronome*, mpova yawu mosi zola kutuba “misiku zole,” mpova *Deutéronome*. Mpe Nzambi kele

na misiku zole. Misiku zole: mosi ya bawu kele ya kukondwa kutumama na Ndinga, mpe kufwa; mpe yankaka yina kele kutumama na Ndinga, mpe kuzinga. Ya kele misiku zole, mpe Deutéronome zola kutuba misiku yango zole. Bawu nyonso zole vwandaka kieleka ya kutalisa na beto na kati ya Masonuku. Mosi ya bawu kele lufwa, yankaka yina kele Luzingu; Luzingu mpe lufwa. Nzambi ke salaka kaka na Luzingu, Satana kaka na lufwa. Mpe bayayi vwandaka ya kutalisa na yinza na ntwala ya bantu nionso, ya kuzibuka na ntwala ya disu nionso, mpe ya kele ve na esikize samu na beto. Mosi ya bawu vwandaka ya kutalisa na zulu ya Mongo Sinaï ntangu ba pesaka musiku, yina fundisaka dikanda nyonso ya bantu na lufwa; yankaka yina pesamaka na Mongo ya Calvaire, yina nataka bantu nyonso na Luzingu, ntangu ba futaka kitumbu na Yesu Klisto. Misiku zole ya Deutéronome salamaka na bima zole yayi, bima ya nene.

⁷⁷ Mu zola beno kutala dyaka, ya vwandaka mpe na bangwisani zole yina ba pesaka. Ngewisani mosi kuplesamaka na Adam, yina vwandaka na misiku, mutindu musiku: “*Kana* beno simba yayi ve, na yina beno ke zinga; kasi *kana* beno simba yayi, beno ke kufwa.” Yina vwandaka musiku. Na yina ya vwandaka na musiku yankaka yina ba pesaka na Abraham, yina vwandaka na nzila ya lemvo, kukondwa musiku: “Mu me vulusa nge mpe nkuna ya nge na manima ya nge.” Amen! Yina kele kifwanukusu ya Calvaire, kifwanukusu ya—ya—ya ngewisani ya Adam, ya kele ngewisani ya Abraham.

⁷⁸ Kasi ntangu yayi beto ke kuwa Yandi kutuba ti ya kele kaka na kisika mosi kisika Yandi ke kutana muntu samu na kusambilia. Beto ke tanga kaka yawu awa na dilongi. Beto ke vutukila yawu, na manima, na baminuti fyoti.

⁷⁹ Na yina kana ya kele kaka na kisika mosi yina Nzambi ke kutana na muntu, beto fwana sala mbote na kusala keba mingi. Ntangu yayi beto losa binkulu ya beto na suka yayi, mpe...na leso ya lukolo ya Lumingu yayi, mpe beto vwanda kieleka ya kundima ti beto ke mona kisika mosi yina. Samu ti, Nzambi me tuba awa, Yandi ke yamba beno ve na kisika yankaka. Dibuundu nyonso yankaka, Yandi ke yamba beno ve. Kaka na kati ya Dibuundu ya Yandi, ya kele kisika mosi kaka Yandi ke yamba beno.

⁸⁰ Ntangu yayi, “Yinki beno ke tuba, Mpangi Branham? Kana mu kele ya kusungama?” Ve.

⁸¹ Beno bambuka moyo, Yesu zonzaka na bantu ya kieleka, misambidi ya kilumbu ya Yandi, mpe Yandi tubaka, “Na mpamba beno ke sambila Munu.” Kusambilia ya kieleka, ya kisina na yisi ya bantima ya bawu. “Na mpamba beno ke sambila Munu, na kulongaka malongi misiku ya bantu,” to credo ya bawu ya ba-denomination. Ya kieleka, na buzitu nionso, kaka musambidi mutindu ba lendaka vwanda. Mpe yina vwandaka ve

ya malu-malu samu na ba-Pharisien. Caïn mpe Abel, misambidi zole ya ntete yina butukaka, mbutukulu ya kimuntu awa na zulu ya ntoto, kieleka kwizaka na nkadulu mosi.

⁸² Caïn vwandaka kaka musambidi mutindu Abel vwandaka. Bawu zole tungaka ba-autel. Bawu zole vwandaka zola Nzambi. Bawu zole pesaka minkayulu. Bawu nyonso zole vwandaka sambila. Bawu nyonso zole vwandaka sala nyonso kaka mutindu mosi. Kasi Abel, na *lukwikilu* yina kele “luzayikisu,” Ndinga ya Nzambi me monisama, me monana pwelele, me talisama pwelele, mpe me siamisama. Nkembo! Caïn salaka munkayulu, kasi Nzambi siamisaka yawu ve. Nzambi lombaka kusambila, mpe Caïn salaka munkayulu, kasi Nzambi siamisaka yawu ve. Kasi na nzila ya kanale ya kieleka . . .

⁸³ Beno ke tuba, “Mbote, dibuundu ya munu kele mutindu yina. Oh . . .”

⁸⁴ Beno vingila kaka minuti mosi. Nzambi ke tendula Ndinga ya Yandi Mosi na nzila ya bampova ya Yawu yina Yandi zonzaka. Beno me mona, Caïn tubaka, “Mu kele musambidi. Mu ke zolaka Kiyidiki ya munu. Mu ke pesa na Nge autel yayi ya mbote. Mu ke pesa na Nge munkayulu yayi. Mu me tunga bima nyonso yayi, Mfumu, samu ti mu ke zolaka Nge.” Abel tubaka kima mutindu mosi. Ntangu yayi, ya kele yandi yina me siamisama, yandi yina me talisama. Mpe Nzambi kulumukaka mpe ndimaka munkayulu ya Abel, samu ti na nzila ya luzayikisu yandi kuzwaka kanale ya kieleka ya Nzambi yina me ndimama.

⁸⁵ Ntangu yayi beno tala mbote ti mpeve ya Caïn kulumukaka kaka na nzila ya Masonuku, tii na kilumbu yayi ya nsuka. Ya misiku? Kaka muntu ya misiku mutindu yankaka vwandaka.

⁸⁶ Beno tala profete Balaam mpe profete Moïse. Bawu nyonso zole na ba-autel sambwadi, ba-autel ya Yehowa, menga vwandaka na zulu ya mosi na mosi; mpe kaka yina ve, kasi mameme ya babakala na zulu ya mosi na mosi. Na numérologie, kieleka lutangu ya kulunga, *sambwadi*, “ya kulunga,” mameme ya babakala sambwadi. Kaka kieleka mutindu mosi, ba-autel nyonso zole. Muntu ya misiku mutindu mosi vwandaka, yankaka yina vwandaka mpe. Kasi nani Nzambi siamisaka? Beno me mona? Beno me mona? Yandi yina vwandaka na kati ya Ndinga ya Yandi. Muntu ya misiku zola kutuba kima ve; ya kele luzayikisu ya Nzambi.

⁸⁷ Ntangu yayi beno banza! Bantu yayi, samu na yinki ba bokilaka bawu mpe ba tulaka bawu na mutindu yayi (ba-Pharisien yayi) na Yesu, yandi tubaka, “Na mpamba nge ke sambila Munu”? Beno sambila Yandi: kusambila ya kieleka, kusambila ya kieleka na bantima ya bawu. “Beno . . . Na mpamba beno ke sambila Munu.” Samu na yinki? Na kulongaka

malongi kinkulu ya bawu ya bantu. “Na yina beno ke sala ti misiku ya Nzambi kusala ve kisalu na bantu.”

⁸⁸ Kana mu longaka beno nsangu ya ba-Methodiste, ya ke sala kisalu ve na zulu ya beno, yayi kele ntangu ya Kento ya makwela. Kana Moise longaka nsangu ya Noé, yawu lendaka sala ve. Kana Yesu longaka nsangu ya Moise, yawu ke sala kisalu mosi ve. Samu bankuna yina ba soolaka na ntwala kele kuna yina ke kuzwa kaka masa na mutindu ya masa yina me pesama samu na nkuna yina. Beno me mona? Ya ke yela ata fioti ve na mutindu yankaka. Ya fwana vwanda na mutindu yina ke kuyelisa yawu.

⁸⁹ Ntangu yayi, beno lenda baka diki ya nsusu mpe kutula yawu na kati ya kibumbulu, yina lendaka vwanda na yisi ya nsusu, kasi yawu ke pasuka na mutindu nionso. Beno tula yawu na yisi ya mwana ya yimbwa ya ke pasuka. Ya kele ndungutila, mutindu yina ke sala ti yawu pasuka. Na yina ya fwana vwanda na yisi ya kondisio. Beno lendaka baka diki ya mbote ya moyo mpe kutula yawu na yisi ya nsusu ya kufwa, yawu ke pasuka ve. Beno me mona? Beno me mona, yawu kele kondisio.

⁹⁰ Mbote, ya kele mutindu ya kele na nsungi yayi yina beto ke na kuzinga, beno fwana tala yina kele mutindu ya Nzambi ya kusala yawu samu na nsungi yayi. Ya kele yina Martin Luther kuzwaka, ya kele yina John Wesley kuzwaka, ya kele yina bantu ya Pantekote kuzwaka na nsungi ya bawu. Nsungi ya Nzambi mpe ntangu ya kusala yawu.

⁹¹ Ntangu yayi, ba-Pentecotiste. Mpangi-bakala yina, mosi... Mu ke kwikila ti yandi...mosi ya meso ya yandi vwandaka mona ve, mpangi-bakala mosi ya ndombe yina bandaka kieleka nsangu ya Pentecote na Californie, na Bala-bala ya ntama Azusa. Ba sekaka yandi, samu ti yandi vwandaka muntu-ndombe. Ba sekaka yandi, kasi yandi longaka nsangu samu na nsungi yina. Kaka mwa nzutu ya fioti, mpangi yina lendaka na mpasi kusonika nkumbu ya yandi, kasi Mfumu monisaka na yandi ti yayi vwandaka nsungi ya kuvutuka ya makabu yango, mpe ya kwizaka. Ata nyonso *yina* ba tubaka, ya me kwiza. Kasi muntu nyonso kotaka na atimosifere ya yawu, mpe monaka ti ya vwandaka nsungi yina, mpe monaka Nzambi kusiamisa ti bantu yina lendaka zonza na bandinga, mpe nyonso yina, ya salamaka. Kasi kuna ntangu yandi kwendaka mpe ndimaka yawu ti “yayi kele nzikisa mosi kaka,” yina kufwaka yawu. Beno me mona? Bawu landilaka kaka, beno me mona. Tala yina salaka yawu. Na yina bawu bandaka na kukabula *yayi, yina*, mpe vwandaka sala ba-denomination; mpe mosi ke tuba ti Yandi ke kwiza na dituti, mpe yankaka yina ke tuba ti Yandi ke kwiza na mulaka. Mpe oh, la la, kuna ya me kwenda.

⁹² Ya kele yina ba-denomination ke salaka. Beno me mona? Nzambi kele ve mubandisi ya denomination, samu ti denomination kele Babylone, mpe Yandi kele ve mubandisi ya

mvwanzi. Beto ke mona yandi nyonso... Beno kele ve na nsatu ya kuvwanda muntu ya kulonguka samu na kumona yawu. Ya kele Babylone! Beno me mona? Kinkulu (beno banza na yawu), bantu ya kieleka. Ntangu yayi, dyaka, samu ti bawu ke kwikilaka yawu, ya kele dyaka na nsatu ya kuvwanda kisika mosi ya kieleka kisika Nzambi ke kutanaka na beto.

⁹³ Ntangu yayi beno tala nzila ya 2. “Beno sambila na kisika yina *Mu me sola*.” Munkayulu, ya kieleka, kisika ba vwandaka sambila kisika yina ba vwandaka pesa munkayulu. “Kisika yina *Mu soolaka*; ve yina beno soolaka, yina muntu soolaka. Kasi yina *Mu me sola*, beno ke sambila na kisika yayi.” Ya ke lakisa ti ya kele kaka na kisika mosi, bisika yankaka kele mpamba. Ya fwana vwanda ve nsodolo *ya beno*, kasi ya fwana vwanda nsodolo ya Yandi.

⁹⁴ “Mbote, mu fwana kwenda ve na dibuundu.” To, “Beno kele ya kusungama mingi na mpeve! Na yina, beno ke swana na bakento samu na kulonga, mpe... to bakento samu na kuzenga bansuki ya bawu, mpe babakala samu na bima yayi yankaka. Na yina, beno kele ya kusungama mingi na mpeve!”

⁹⁵ Mbote mingi, beno fwana ve kubaka nzila ya Nzambi samu na yawu, beno ke kwenda kisika bawu ke salaka yawu. Beno me mona? Mpe beno ke tala ti ya kele na kati ya Masonuku, na yawu, “Na mpamba ba ke sambila Munu.” Yesu zonzaka samu na kima mutindu mosi. Beno me mona?

⁹⁶ Ti konso kima ya fyoti, nyonso, beno fwana vwanda ya kukwikama. Ya kele ntangu nyonso mwa—mwa vinu yango, mwa—mwa kibulu yina ke bebisaka vinu. Bantangu yankaka beno ke katuka... Ya kele ve bima ya nene yina beno ke salaka, ya kele bima ya fyoti yina beno ke bikaka na kusala ve. Beno bambuka moyo, muniololo kele ngolo mingi na kisika ya yawu ya kulemba mingi. “Kyese na bayina ke zitisaka misiku *nyonso* ya Nzambi, samu ti bawu fwana kuzwa muswa ya kukota.” Beno sala *nyonso* Nzambi tubaka.

⁹⁷ Kana Ya me tuba ti bakento kuvwanda na bansuki ya yinda, beno ke tuba...bakala mosi tubaka na munu ntama mingi ve, yandi tubaka, “Mu ke longaka ve nsambulu yina ke talaka bilele.”

⁹⁸ Mu tubaka, “Na yina nge ke longa Nsangu ya mbote ve.” Yinga.

⁹⁹ Nzambi tulaka yawu kuna, Yandi tubaka yinki kusala. Mpe to beno ke sala yawu... Yina kele mutindu ya beno ya kimuntu, kima ya kusungama. Mwa kima ya fioti... yina... mwa bima ya kukondwa mfunu. Yesu tubaka, “Kyese na bayina kele ya kwikama na bima nyonso ya fyoti, yina ke zitisaka bima ya fyoti.” Mpe kento yina ke bika bansuki ya yandi kukula, ya kele kaka... mbote, ya kele kaka kima yina *yandi* lenda sala, mpe yandi ke sala yawu ve. Yandi ke sala yawu ve.

¹⁰⁰ “Oh, longa beto bima ya nene.”

¹⁰¹ Wapi mutindu beno lenda longa bima ya nene, na yina beno ke sala ve kima ya fioti, ya mumesanu? Samu, beno me mona, mitifi ya beno mpe kikuma ya beno kele yimbi.

¹⁰² Ya kele zola ya beno na Nzambi, “Mfumu, mu ke kipe ve yina Nge zola ti mu sala, mu zola kusala yawu.” Na yina beno ke na kukuma kisika mosi, kasi kana beno sala yawu ve mutindu yina, mutindu Yandi tubaka na kusala yawu . . .

¹⁰³ Ya kele nsodolo ya Yandi, “Kisika yina mu me sola.” Ya kele kisika beno ke sambilaka na munkayulu ya beno.

¹⁰⁴ Beno tulaka . . . Caïn nataka munkayulu ya yandi, Abel nataka ya yandi, ya ke tala na kisika yina beno ke tula yawu. Kana beno tula yawu na kisika yina Yandi me sola, ya ke vwanda mbote mingi, Yandi ke ndima yawu; kana ve, Yandi ke ndima yawu ve. Beno kipe ve, ya kele munkayulu mosi, nyonso yina ya kele, ya kele kaka ku- . . . yina ba me losa, kaka kana ba me talisa yawu na kisika mosi ya kieleka.

¹⁰⁵ Ntangu yayi beto zola zaba kisika beto zola kunata munkayulu yayi. Beto lendaka mona . . . Beto nionso zola kwenda na Mazulu. Mutindu yina ve? Mpe beto nionso me zaba ti beto me sala yimbi. Beto nionso ke kwikila ti Yesu kele Munkayulu. Ntangu yayi beto zola kuzaba kisika ya kubaka Yandi, ba ke—ba ke ndima yawu. Beno me mona? Ya kele kieleka. Biblia ke tuba na beto kisika ya kubaka yawu, beno me mona, mpe ba ke ndima yawu; na ngaanda ya kuna, ba ke ndima yawu ve.

¹⁰⁶ Beto tala awa mpe kisika yina Yandi soolaka samu na munkayulu na kuvwanda, kisika yina Yandi soolaka na kutula munkayulu. Beno lenda ve kutula yawu na zulu ya mosi ya myelo yayi; kasi kisika yina Yandi solaka na kutula yawu, Yandi mpe tulaka Nkumbu ya Yandi na kisika yina. Ya kele yina Yandi tubaka awa. Yandi solaka na kutula Nkumbu ya Yandi na kati ya yawu. Ntangu yayi beto longuka Masonuku samu na kisika yayi, samu ti ya kele kisika yina Yandi ke tula Nkumbu ya Yandi.

¹⁰⁷ Ntangu yayi beto tanga na dilongi. Mpe mu vwandaka na mwa noti mosi ya kunotika awa yina mu . . . na suka yayi, ya me kwiza na munu. Beto baka nzila ya 2 ya kapu yayi. Ntangu yayi, mu zola ve kukanga beno ntangu ya yinda, samu na bantu yina ke na kulanda na alo-alو, na bisika ya mutindu na mutindu na yinsi. Ntangu yayi nzila ya 2 ya kapu ya 16 yayi:

*Nge ke pesa na yawu munkayulu ya paki na MFUMU
Nzambi ya nge, samu na kimvuka ya mameme ya nge
mpe mameme ya nge, na kisika yina MFUMU ke soola na
kutula nkumbu ya yandi kuna.*

¹⁰⁸ Ntangu yayi, beno lenda ve kubaka yayi . . . kusungama ya beno mpe nyonso yina beno zola kufunguna, beno lenda kaka ve kunata yawu na autel ya ba-Methodiste, na autel ya ba-Baptiste,

na autel ya ba-Pentecotiste, kasi ya kele na autel kisika mosi kuna yina Yandi soolaka ti Yandi... samu na kutula Nkumbu ya Yandi na kati ya yawu, mpe Yandi ke kutana na beno na kisika yina. Ntangu yayi, kana beno sala nionso na mutindu ya mbote, ya ke sala; nionso na ndonga. Kana ya kele na court-circuit na nsinga yina, nsemo yina ke pela ve; samu ya me zengana. Mpe ntangu beno ke baka mosi ya Bandinga ya Nzambi to mosi ya bisika ya Yandi, mpe na kati ya ntima ya beno mosi kele na balukanu ya munimi, ya ke kufwa ngolo ya Nzambi kaka kuna. Kana beno sala yawu samu ti beno zola kuvwanda na mayela, beno zola kuvwanda ya kuswaswana na muntu yankaka, to kima mosi, kaka kuna kima mosi ke tambula mbote ve, ya ke panza fizible. Beno me sala kifu. Beno fwana kwiza na bukieleka, na ntima ya beno nyonso, bamitifi ya beno mpe balukanu ya beno ke vwanda kaka na Nzambi. Na yina beno sosa kisika ya *Yandi*, beno tala kisika Yandi tubaka, mpe beno nata yawu kuna. Beno me mona?

¹⁰⁹ beno tala Marthe na Marie. Ntangu Yesu yutukaka, na manima Yandi longaka bawu Nsangu ya mbote yayi (Nsemo ya kilumbu ya Yandi, Yandi vwandaka Mesiya), Ba yinaka Yandi, ba losaka Yandi. Oh, ba-Pharisien mpe mabuundu mangaka Yandi. Kasi Lazare kufwaka, mpangi ya bakala yina vwandaka nkundi ya ntima ya Yandi. Yandi bikaka yandi ya kulala kuna; mpe bawu kwendaka sosa Yandi, Yandi kwizaka ve.

¹¹⁰ Kasi beno tala mbote Marthe, nkadulu ya yandi. Yandi tubaka, “Mfumu, kana Nge zolaka vwanda awa.” Ya pesaka Yandi muswa ya Yandi ya kieleka: Mfumu, kisono ya nene M-f-u-m-u, *Yahweh*, Yehowa. Nkembo! “Kana Nge vwandaka awa, mpangi ya munu ya bakala zolaka kufwa ve.” Luzingu mpe lufwa lenda vukana ve na kanale mosi, to na yinzo mosi. “Nge ke... Yandi zolaka kufwa ve.”

¹¹¹ Yesu tubaka na yandi, “Mu kele mvumbukulu mpe Luzingu,” me tuba Nzambi. Beno me mona? Ntangu Yandi tubaka, ntete, “Mpangi ya nge ya bakala ke zinga dyaka.”

¹¹² Yandi tubaka, “Yinga, Mfumu, ya kieleka mu ke kwikila yawu. Mutindu Juif, mu ke kwikila ti ya ke vwanda na mvumbukulu ya bantu nionso ya kufwa; mpe mu ke kwikila ti mpangi ya munu ya bakala vwandaka kaka ya kukwikama mpe ya kusungama na bisambu. Mpe mu ke kwikila ti Nge kele Mesiya yina, yina ba tubaka na kati ya Biblia, samu ti Nzambi ke siamisa Ndinga ya Yandi na kati ya Nge ke lakisa ti Nge kele Munati-nsangu ya ngunga yayi. Nge kele Mesiya yango. Mu ke kwikila ti Nge kele Klisto yina zolaka kwiza, samu ti bisalu ya Nge ke pesa kimbangi ti Nzambi me fidisa Nge awa na kuvwanda Mesiya yina.” Oh, la la! Beno tala mbote bisengo ke banda na kubaluka mbote ntangu yayi. Beno me mona?

¹¹³ Ntangu yayi, yandi vwandaka na muswa ya kutuba, “Samu

na yinki Nge me kwisa telemisa ve mpangi ya munu ya bakala? Samu na yinki Nge me belusa yandi ve? Nge me belusa bayankaka. Nkundi ya nge ya kulutila, mpe ntangu yayi beno tala yina me salama.” Ve, ve, na lukanu ya mutindu yina beno ke kuma kisika mosi ve.

¹¹⁴ “Mu ke kwikila ti Nge kele kieleka Yina me talisama na kati ya Masonuku. Mu ke kwikila ti yayi kele kilumbu yina Mesiya ke kwiza; beto vwandaka vingila yawu. Mu ke kipe ve yina bantu yankaka ke tuba. Mu ke kwikila na ntima ya munu ya muvimba, na nzila ya yina mu me mona mpe me kuwa na nzila ya Ndinga, ti Ndinga me siamisama na Nge, ti Nge kele Mesiya yina.” Beno me mona, kuna na kati ya yandi, yandi—yandi vwandaka na kima ya kulomba, kasi yandi zolaka kwiza na kanale ya mbote.

¹¹⁵ Yinki zolaka salama kana yandi kwendaka mbangu kuna mpe yandi tubaka, “Na yina Nge tubaka na munu ti Nge kele Mesiya yina! Mpe kukondwa lutondo, kukondwa kuvwanda bakala ya luzitu mingi samu na kupesa mvutu na lombilu ya beto; na yina beto disaka Nge mpe yambaka Nge na yinzo ya beto, mpe nyonso yina, mpe bakaka kisika samu na Nge, mpe bikaka mabuundu ya beto, mutindu Nge tumaka beto na kubasika na ba-denomination yina.” Beno me mona? “Mpe kuna beto bikaka yawu, mpe ntangu yayi beto me kuma mutindu bantu ya mpamba-mpamba mpe bimpumbulu. Mpe nyonso yina beto me sala samu na Nge, mpe dyaka Nge me kondwa lutondo samu na kupesa mvutu na mbokolo ya munu?” Ntangu yayi, kieleka, yandi vwandaka na muswa yina.

¹¹⁶ Mutindu beno ke tuba samu na bansuki ya beno ya nkufi, “Mu kele muntu ya yinsi ya Amerika. Mu lenda lwata bakupe, kusala nyonso yina mu zola, ya kele ve na ngaanda ya musiku.” Yina kele bamuswa ya beno, kasi dimeme ke pesaka ntangu nionso bamuswa ya yandi. Uh-huh. Kana beno kele mwana-dimeme! Yandi kele na kima ve kasi mika, yandi ke pesa yawu. Yina kele bamuswa ya Nzambi me pesa yandi, kasi yandi me pesa yawu.

¹¹⁷ “Mu ke na muswa ya kukota na denomination mosi.” Ya kieleka kaka, kasi beno ke pesa yawu. Beno me mona?

¹¹⁸ Yandi pesaka bamuswa nionso yina yandi me kuzwa, samu na kuzaba Ndinga ya Nzambi yina me monisama kaka kuna na ntwala ya yandi.

¹¹⁹ Yandi tubaka, “Mu kele mvumbukulu mpe Luzingu. Yandi yina ke kwikila na Munu, ata ti yandi me kufwa, kasi yandi ke zinga. Yina nionso ke zinga mpe ke kwikila na Munu ke kufwa ata fioti ve. Nge me kwikila yawu?” Beno me mona, ya vwandaka dyaka na mwa bameno ya bisengo yina vwandaka baluka dyaka mbote ve. Beno me mona?

¹²⁰ “Yinga, Mfumu! Mu ke kwikila ti Nge kele Klisto, Mwana ya Nzambi ya moyo!” O mpangi, nyonso vwandaka ya kuyilama na kupelisa tiya kaka kuna. Beno me mona?

¹²¹ “Wapi kisika beno me tula yandi?” Beno me mona? Mpe beno zaba yinki salamaka.

¹²² Beno me mona, beno fwana kota na kisika yina ya kieleka ntete Yandi ndima munkayulu ya beno. Beno me mona, beno fwana kukota na yawu. Ntangu yayi, beno tala mbote.

...na kisika yina MFUMU ke soola na kutula nkumbu ya yandi kuna.

Nge ke kudya dimpa ya kukondwa levire na kati ya yawu;...

¹²³ Yinki ke fwanana na munkayulu? Beno vukisa yawu ve na credo mosi, ya fwana vwanda Ndinga. “*Ve dimpa ya levire.*” Levire kele... Beno zaba yinki levire kele na kati ya kima nionso. “Mwa levire ke vimbisaka pati nionso,” pati nionso kele Nzutu. Beno lenda ve kutula ata ditona mosi ya denomination to credo na Klisto. Ve, tata, ya ke simba ve.

¹²⁴ Beno ke bambuka moyo na nsangu ya Kilumbu ya yiya na nkokila? Bakala ya nge ya ntama fwana kufwa. Ya kele kieleka. Bakala ya nge ya malu-malu kele Ndinga.

...bilumbu sambwadi nge ke kudya mampa ya kukondwa levire na kati ya yawu,...

¹²⁵ “*Bilumbu sambwadi,*” yinki ya ke talisa? Bansungi Sambwadi ya Dibuundu ya muvimba, bilumbu sambwadi. Samu na yinki bawu zolaka kudya yawu bilumbu sambwadi? Ntete yinki? Ntete bawu basika. Mpe nsungi ya dibuundu ya muvimba, kubanda mbandukulu tii na nsuka, fwana zinga kaka na zulu ya Ndinga ya Nzambi ya nsungi yina. Na yawu credo ya beno ya ba-Romain, ba-Methodiste, ba-Baptiste, mpe ba-credo ya ba-Pentecotiste nionso me kufwa.

¹²⁶ Ntangu yayi beno tala mbote.

...kuna na kati, mpe dimpa ya mpasi;...

Ba talisaka bawu mpasi samu na Yawu; Luther, Wesley, ba-Pentecotiste; ba talisaka bawu nionso mpasi, mpe mutindu mosi beno ke sala.

...samu ti nge basikaka na yinsi ya Egypte na mbangu:... samu ti nge bikana kilumbu yina... bambuka moyo kilumbu yina nge basikaka na yinsi ya Egypte bilumbu nyonso ya luzingu ya nge.

Mpe ya ke vwanda ve na dimpa ya levire yina ba ke mona na...na yinsi ya nge nyonso bilumbu sambwadi;...

¹²⁷ Na Kento ya makwela ya kitoko ya Klisto, na manima ya lufwa ya Yandi na kati ya Bansungi ya Mudidi na nzila ya

kimfumu ya Rome, ti Yandi zolaka kufwa, “Kana mbuma ya blé kubwa na ntoto.” Bakala ya makwela zolaka kwiza, Kisalu ya kulunga ya Nzambi. Beno nyonso kuwaka nsangu ya munu na zulu ya yawu.

¹²⁸ Mu telamaka kuna, na Los Angeles, na Forest Lawn, kilumbu mosi, mpe ntima ya munu dumukaka. Bantu yikwa me vwandaka ntete na Forest Lawn? Ya kele . . . kiteki ya Moise na—na . . . -wanzio, mu banza ti ya kele, Michel-Ange. Ya kele kiteki ya kulunga, nionso katula kaka na dikulu ya kibakala; ya kele na mpwasika pene ya centimetele mosi. Mpe ntwadisi . . . Mu vwandaka tala, mpe yandi lakisaka munu yawu. Yandi tubaka, “Michel-Ange lutisaka luzingu ya muvimba na kumeka na—na kusala . . . Yandi vwandaka kisadi-biteki, mpe yandi vwandaka meka na kusala kifwanisu ya Moise. Kuna na dibanza ya yandi, yandi vwandaka na dibanza ya mutindu Moise zolaka vwandala. Yandi vwandaka na yawu na kati ya ntima ya yandi, mutindu Moise zolaka vwandala. Mpe na yina yandi lutisaka luzingu ya yandi nionso; na kuzenga awa, na kunika yawu, na kuvutuka fioti na manima mpe kutala yawu. Mvula na manima ya mvula, yandi salaka na zulu ya yawu. Na nsuka ntangu yandi manisaka yawu, mpe yandi vutukaka mpe tululaka kitende ya yandi mpe nzundu ya yandi, yandi talaka kiteki. Ya vwandaka ya kulunga mingi kifwanisu ya Moise yina yandi kuzwaka na kati ya ntima ya yandi, tii yandi basikaka mingi na kati ya yandi mosi, yandi bakaka nzundu mpe bulaka yawu, yandi bokaka, ‘Tuba!’” Ba ke bokilaka yawu *Kisalu ya kulunga ya Michel-Ange*. Kima ya nene yina na kisadi-biteki yina, vision yina vwandaka na yandi na yina Moise zolaka vwandala, talisamaka kaka na kifwanukusu ya Tata ya nene Nzambi.

¹²⁹ Yandi vwandaka na kati ya ntima ya Yandi, ntete mbandukulu ya yinza, Mwana, samu ti Yandi kele Tata. Kasi ya vwandaka kaka na kati ya misisa ya Ndinga ya Yandi. Mpe Yandi vangaka muntu, mpe Yandi zolaka tula yandi na kimpwanza ya kusoola, kasi muntu yina kubwaka. Kasi Kisadi-biteki ya nene, Nzambi, yina salaka muntu na fundu-fundu ya ntoto, Yandi sukisaka ve samu na yawu, Yandi bandaka dyaka na kusala muntu. Mpe Yandi salaka Noé, yandi fwaka ya kulawuka malafu. Yandi salaka Moise yina lembanaka na kuzitisa Ndinga ya Yandi. Yandi salaka baprofete yina kimaka mbangu na ntangu ya mpasi. Mpe Yandi landilaka na kutunga mpe kusala tii na manima ya mwa ntangu fyoti Yandi zolaka kisalu ya kulunga, samu na katalisa Yandi, nkadulu ya Yandi, yina vwandaka na kati ya ntima ya Yandi yina mwana zolaka vwandala.

¹³⁰ Kilumbu mosi, kuna na Jourdain, na manima Kisalu ya kulunga yina me salama mpe me yilama, awa Yandi kulumukaka na . . . na zulu ya mapapu ya Yembe, yandi tubaka, “Yayi kele Yandi!” Yandi vwandaka na kyeze mingi na Kisalu ya kulunga

yayi tii ntangu Yandi bulaka Yandi na Calvaire, ti Yandi ke kufwa samu na bayankaka ya beto yina kele ya kulunga ve; ti na nzila ya kutiamuka ya Menga ya Yandi, Yandi lendaka nata bisalu mingi ya kulunga (mutindu Kento ya makwela) na Mwana ya Yandi. Kisalu ya kulunga kele na ditona samu na nsayi Nzambi kuzwaka na kumona Kisalu ya kulunga ya mutindu yina, Yandi bulaka Yandi samu na beto nyonso. Beno me mona? Kuna Yandi kufwaka, samu na kukumisa ya kulunga beto yina kele ya kulunga ve. Kisalu ya kulunga.

¹³¹ Beno tala, na kati awa Yandi tubaka:

... *bilumbu sambwadi* nge ke *kudia dimpa* yayi ya
kukondwa levire . . .

¹³² Ntangu yayi, dimpa kele kifwanukusu. Yesu tubaka, “Muntu ke zinga kaka na dimpa ve, kasi na Ndinda nionso.” Ve kaka—kaka Ndinda awa mpe kuna mutindu ba-dénomination beno ke kwikila Yawu. Kasi Ndinda ya Nzambi kele ya kulunga! Ya kele Nzambi Yandi mosi na mutindu ya mukanda, yina ba ke bokila “Nkuna.” Mpe mutindu ya lukwikilu ya kulunga ya kukondwa mvindu na kati ya Ndinda yina ke nata Nkuna yina na Luzingu ya yandi.

¹³³ Ya kele kieleka yina beno ke monaka na mpimpa na kuswasikisa mabanza, mpe bima nyonso yankaka yayi, samu ti ya kele nsilulu yina Nzambi salaka. Mpe Yandi telamaka pene-pene ya munu mpe tubaka na munu ti, mpe tubaka na munu yayi “bantu ya luvunu ke telama, kasi vwanda ngwi.” Mu ke kwikila Yawu. Mpe ata motifi ya tuyimi ve, samu na kuniongisa muntu mosi, kasi samu na kuvwanda na buzitu na Nzambi mpe kusala kisalu yina Yandi bokilaka munu na kusala, ya kele samu na yina mu ke tuba bima yayi. Mpe Nzambi ke siamisaka yawu, mpe ke ndima dikabu mpe munkayulu, na kusiamisaka yawu ti ya kele Kieleka. Ata kyuvu na Yawu! Ntangu yayi beno tala mbôte Ndinda yango!

¹³⁴ Ntangu yayi, beto ke mona awa, “*Bilumbu sambwadi*,” ya kele samu na nsungi nyonso ya dibuundu. Ntangu yayi, mutindu Kisalu ya kulunga yina zolaka kufwa, samu na kuvumbuka na lufwa samu na kuvulusa beto nyonso, na yina Yandi tulaka Dibuundu na ndonga na Pentecote, kasi Dibuundu yina zolaka luta na munkayulu; mpe yinza ya Rome kufwaka yawu, tulaka yawu na ntoto.

¹³⁵ Mutindu nsoniki yayi ya buku yayi, mu lenda banza na yawu ve ntangu yayi, yandi sekaka munu mingi, mpe tubaka, “Na bampeve nyonso ya yimbi, ya kele William Branham.” Beno me mona, ya kele yina dyabulu kemekaka na kutuba. Yandi tubaka, “Ba-vision mpe nyonso,” yandi tubaka, “ya kele ya dyabulu,” yandi tubaka, “to, yandi kele mutindu muloki, to yandi ke salaka na kutanga ya mabanza.” Yinza ya mayela kemekaka ntangu nyonso na kubakula Yawu.

¹³⁶ Ya kele kisika yina bawumekaka na kubakula Yesu. “Wapi mutindu Nge ke salaka bima yayi? Yinki salaka yawu?”

¹³⁷ Yandi tubaka, “Mu ke yufula nge kiuvu mosi. Ya vwandaka ministere ya Jean-Baptiste... Ya vwandaka ya Nzambi to ya vwandaka ya muntu?” Beno me mona?

¹³⁸ Yandi tubaka, “Beto lenda tuba ve.”

¹³⁹ Yandi tubaka, “To mu ke tuba na nge ve.” Ya kele kieleka. Ba landilaka na kukwenda. “Katuka ntangu yayi muntu ve yufulaka Yandi kima mosi.” Beno me mona? Yandi zengaka kaka bawu, Yandi tubaka na bawu kima mosi ve samu na Yawu; ata kima mosi ya kusala na bawu. Yandi vwandaka na kisalu ya kusala mpe Yandi manisaka yawu.

¹⁴⁰ Nzambi sadisa beto na kusala kima mutindu mosi. Beto fwana pesa mvutu ve na bakyuvu ya dyabulu, ya kele kieleka, “Kana nge kele, sala *yayi-mpe-yayi*.” Beno kele na kiyeka ya Nzangu ya mbote yina, longi mpe, mpe yimeni; ve mutindu Yawu kele ya kusonika, yawu kele kaka na kiyeka ya kutuba Yawu.

¹⁴¹ Mpe mutindu kisadi, kana beno kele profete, beno kele na kiyeka na ntewala ya Nzambi. Mpe kana ba-vision yina ke kwisa ya ke lezima Masonuku yayi mpe ke talisa yina Yawu kele, beno kele na kizitu ya konso Ndinga yina kele na kati ya Biblia yina, samu ti Yawu nyonso vwandaka ya kusonika na mutindu mosi ya bantu mutindu beno kele. “Nzambi na ntangu ya ntama, salaka na nzila ya baprofete, mpe sonikaka Sa-... Biblia ya Santu.” Beno me mona? Mpe profete ya kieleka ya Nzambi lendaka manga Ndinga mosi ya Yawu, kasi ke kwikila Ndinga nionso mpe ke longa mutindu mosi. Mpe na yina Nzambi me tumama na ngolo na nzila yina samu na kusala ti Ndinga yina kusalama kaka kieleka mutindu ba silaka Yawu, Nkuna ke yela.

¹⁴² Ntangu yayi, beno tala dyaka, na nswalu, beto ke tala awa ti bilumbu nyonso sambwadi yina dimpa yayi zolaka kudyama, na kati ya Bansungi Sambwadi ya Dibuundu. Ntangu yayi, na yina ya zolaka kufwa mpe kukota na ntoto.

¹⁴³ Muvwezi yayi yina vwandaka zonzila munu, tubaka, “Nzambi yina beno ke sambilaka, yina lendaka vwanda na Bansungi ya Mudidi mpe kutala bamama yayi, na kivumu, bayankaka ya bawu na mwa ba-bébé na maboko ya bawu, bantu ya kusungama, ba losaka bawu na arene mpe bankosi ke pasula bawu bitini-bitini, mpe bawu ke boka; ba ke koma bawu na bakulunsi mpe ba ke yoka bawu na tiya; ke katula bakento kinkonga, bamwense ya bantwenia, mpe ke losa bawu mosi na manima mutindu *yayi*, mpe ke losa bankosi na zulu ya bawu.” Yandi tubaka, “Nzambi yina lendaka vwanda na Mazulu, yina zolaka vwanda na kiti ya Yandi ya kimfumu, mpe talaka na yisi mpe tubaka ti Yandi me sepela na yawu,” yandi tubaka.

¹⁴⁴ Na yina, beno me mona, ya kele dibanza ya lukolo yina kele ya dyabulu. Kana muntu vwandaka ya kimpeve, yandi zolaka

zaba ti mbuma yina ya blé fwana kufwa, ba zolaka zika yawu na cathédrale ya Rome.

¹⁴⁵ Kasi kuna mwa kuvumbuka ya ntete ya Luzingu ke basika na kusungika na nzila ya Martin Luther, ti, “Muntu ya kudedama ke zinga ve na nzila ya dimpa kascher yina nganga-Nzambi ke salaka, kasi na nzila ya Ndinga ya Nzambi. ‘Muntu ya kudedama ke zinga na nzila ya lukwikelu!’” Yandi basisaka bafelele zole. Mbuma ya blé bandaka na kuyela.

¹⁴⁶ Na manima me kwiza John Wesley mpe me bwela na yawu. (Ya vwandaka na mingi ya bayankaka, ti... Zwingli mpe bayankaka me basika mpe me manga mbutukulu ya bumwense, mpe ya me kufwa kaka.) Kasi kuna me kwiza ba-Méthodiste, felele, putulu, kilumbu ya ba-missionnaire. Mpe bawu longaka kusantisama; ya bwelaka felele.

¹⁴⁷ Na manima kwizaka ba-Pentecotiste na mpusu, mingi, samu na kuvuna bantu ya Kusolama. Ya ke talana mutindu mbuma ya kieleka ya blé, beno zibula yawu, ya kele ve na blé ata fyoti ve. Kasi Luzingu ke na kulutaka na mpusu.

¹⁴⁸ Ntangu yayi, beno me mona, konso bamvula tatu na manima ya lukutakanu ya nene, yinki ke salama? Dénomination. Yayi kele bamvula makumi zole mpe ata dénomination ve. Mwana-dimeme ya luzolo yina kufwaka, ti ya sala yawu ata mbala mosi ve. Kana mu kota na nsungi yayi, ti bantu yina ke kwikila ti Nsangu yayi me ndimaka ata fioti denomination mosi! Nzambi ke... Beno ke kufwa kaka kuna! Beno bambuka moyo na yawu! Kaka na ngunga yina beno ke zonzila dénomination na kati-kati ya beno, mu ke kipe ve mutindu beno kele ya kusungama, beno ke baka muntu samu na kuvwanda ntwadisi ya beno na kisika ya Mpeve-Santu samu na kusiamisa Ndinga yayi, ya kele na ngunga yina beno ke kufwa! Nkuna ya kieleka lenda ve, samu ti ya kele ve na kima me bikana na manima ya nkuna, ya kele kima mosi kaka yina vwandaka kuna na mbandukulu. Ya kele Kento ya makwela yina kubwaka na ntoto samu na kubasisa dyaka mbuma ya blé.

¹⁴⁹ Beno tala:

...bilumbu sambwadi nge ke kudia dimpa ya
kukondwa levire...

¹⁵⁰ Mpe ya ke vwanda na Kento ya makwela...

¹⁵¹ Ntangu yayi, beno bantu yina vwandaka na mama ya kiboba ya Methodiste yina vwandaka boka, mpe nyonso yina, ti beno vwanda kukiyufula “Kana yandi zonza ve na bandinga, yandi ke vwanda kuna ve.” Ya kele luvunu! Yandi vwandaka Mpeve-Santu mosi yina kele na beno bubu yayi, kasi ya vwandaka na mutindu ya felele, kuvutuka ya makabu ve. Kasi bilumbu nyonso sambwadi, ba vwanda kudya kaka dimpa ya kukondwa levire, Ndinga. Bawu, na manima, bawu yina salaka dénomination, bawu kufwaka. Bawu kele yinti, bawu ke vukisa kaka yawu

mpe ke yoka yawu na tiya. Kasi Luzingu ke na kulandila kaka. Mpe yinki ke salama? Luzingu nyonso yina vwandaka na yinti, na felele, na mpusu, yawu nyonso ke suka na blé. Mpe Mpeve-Santu mosi yina nataka Luther, nataka Wesley, nataka ba-Pentecotiste, ke suka na kati ya Kento ya makwela na mvumbukulu.

¹⁵² “Bilumbu sambwadi, nge ke kudia dimpa ya kukondwa levire.” Ata levire ve ke vwanda na kati ya Kento ya makwela, ata mpova mosi ve ba me bwela, ata kima mosi ve. Beno bambuka moyo, ndinga mosi nataka lufwa nyonso yina kele na ntoto; mwana nyonso ya makangu butukaka samu ti Eve, dibuundi ya ntete, kento ya makwela ya Adam ya ntete, tulaka ntembe na Ndinga ya Nzambi mpe ndimaka denomination, to muntu ya mayele, to lukolo na kisika ya Yawu; samu ti Yawu vwandaka ya kubanza, ti, “Kieleka, Nzambi kele Nzambi ya mbote.” Nzambi kele Nzambi ya mbote, kasi Yandi kele mpe Nzambi ya kudedama. Beto fwana zitisa Ndinga ya Yandi! Lukolo, yandi ndimaka yawu.

¹⁵³ Ya kele kisika bantu yankaka na kati ya beno bana ya babakala ya seminere, kukondwa ntembe lubokilu na lusingu ya beno, kasi beno ke kwenda na lukolo mosi ya Biblia samu na kuzwa malongi yayi ba me kotisa na kati ya beno, mpe ya kele kisika yina beno ke kufwa... Beno kangama na Nzambi mpe Ndinga ya Yandi. Ba ke bika beno ve; to, beno lendaka ve kuvwanda ya dibuundi ya bawu, ba ke ndima beno ve na estrade. Na yawu beno bika bawu kuzwa yawu, beno bika bantu ya kufwa kuzika bantu ya kufwa, ti beto landa Klisto Ndinga.

¹⁵⁴ Ntangu yayi, bilumbu sambwadi ya ke vwanda ve na levire ba me vukisa na kati ya Kento ya makwela, Dibuundi, bilumbu sambwadi.

¹⁵⁵ Ntangu yayi beno tala. Ntangu yayi mutindu ve...

Mpe ya ke vwanda ve na dimpa ya levire yina ba ke mona na kati ya nge na yinsi ya nge nyonso bilumbu sambwadi;... (Munkayulu awa kele kifwanukusu: Kento ya makwela ke basika na Munkayulu yina kele Klisto.) ...to ya ke vwanda ve na kima mosi ya nsuni, yina nge pesaka munkayulu kilumbu ya ntete na nkokila,...

¹⁵⁶ Mpe beno bambuka moyo—beno bambuka moyo mutindu beto talaka kaka Bansungi ya Dibuundi? Munati-nsangu ya dibuundi ntangu nyonso ke kwizaka kaka na lufwa ya nsungi yankaka ya dibuundi, ntangu nyonso. Lufwa ya Pantekote ke nata enlevement ya Kento ya makwela. Beno me mona? Lufwa ya Luther butaka Wesley. Beno me mona? Lufwa ya Wesley butaka Pentecote. Lufwa ya Pantekote me basisa Nsangu ntangu yayi. Awa, ya kele kaka awa, ke baka kifwanukusu nyonso ya Masonuku. Ya kele ve na Masonuku na kati ya Biblia kasi

yina ke na kulandaka kaka mosi na yankaka. Beno me mona? Bifwanukusu nyonso yayi. Mu kele na ndongosolo ve, kasi mu kele na Mpeve-Santu yina ke lakisa munu na nzila ya kanale yankaka samu na kulonga yawu, yinza; mpe ya kele na nzila ya Ndinga. Ya fwana vwanda Ndinga, bima yayi ba silaka.

...nsuni, ...munkayulu *kilumbu ya ntete* . . . mpe, ke
bikana mpimpa nyonso tii na suka.

¹⁵⁷ Ntangu yayi, mpe Luther, yina vwandaka na Kieleka mpe longaka dibuundi “muntu ya kudedama ke zinga na lukwikelu.” Beno zola ve kukangama na yawu na kuvwandaka malongi ya muvimbba, na nsungi ya ba-Méthodiste. Yinki beno ke sala? Beno yoka yawu na tiya. Yinki vwandaka kifwanukusu? Denomination yina me basika na Ndinga yina kele mpusu, mwinka, mpusu, fwana yokama na tiya. Kitini yina ya denomination yina ya me basika fwana bikana ve, ya fwana kufwa. Beno bika yawu ve tii kubasika ya nsungi yankaka—yankaka, beno yoka yawu! Yandi ke na kuzonzaka ntangu yayi na Kento ya makwela awa, kaka Kento ya makwela, yina ke na kwiza na kati ya bansungi nyonso.

¹⁵⁸ Beno tala mutindu kitoko, “Menga ya mwana-dimeme.” Yayi kele Nzutu ya Klisto, Munkayulu: menga ya mwana-dimeme na kielo. Ntangu yayi, beno bambuka moyo, ba kufwaka mwana-dimeme yina vwandaka kifwanukusu ya Klisto.

¹⁵⁹ To beto lendaka baka ntangu mingi, kasi mu kele ve . . . kaka baminuti fyoti dyaka samu na kuvwanda awa. Mu lendaka telama mpe kubanda diaka na nkokila yayi, beno me mona, samu beto ke baka ntangu mingi. Ya kele . . . Mu kele na ba-page makumi zole ya yayi na kati awa, ya banoti, na zulu ya dilongi yayi mosi.

¹⁶⁰ Beno tala ntangu yayi, na yayi, mwana-dimeme vwandaka Klisto na mutindu ya kifwani. To mu me tuba yawu mbote? Kifwanukusu; Klisto vwandaka Mwana-dimeme. Yandi zolaka vwanda bakala, ya ntete na kati ya mama dimeme; to dimeme, to konso mutindu yina beno ke soola na kubokila yawu. Ya fwana vwanda ya yandi ntete. Mpe yandi fwana vwanda ya kumekama ntete na kumona kana ya kele na kifu na zulu ya yandi.

¹⁶¹ Ntangu yayi, ba mekaka Klisto; mwana-dimeme ya ntete na kati ya yinzo ya mama, Marie mwense. Mpe ba mekaka yandi na yinki? Satana teleminaka Ndinga. Ntangu yandi bulaka Eve, yandi bwaka; yandi bulaka Moise, yandi bwaka; kasi ntangu yandi kutanaka na Klisto, mpe mekaka na kutangila Yandi Masonuku na mutindu ya yimbi, uh-huh, yandi monaka ti yina vwandaka ve Moise. Beno me mona? Yandi mekamaka. Yinki. . . yandi balukaka, yandi tubaka, “*Kana Nge kele Mwana ya Nzambi*. Ntangu yayi ba ke tuba na munu ti Nge ke sala bimangu, mpe ba ke tuba na munu ti Mesiya ke sala yawu. Ntangu yayi, kana ya kele mutindu yina, Nge kele na nsatu, Nge

me kudya ve, kitula dimpa yayi na, to, matadi yayi na dimpa, mpe kudya.”

¹⁶² Yandi tubaka, “Ya kele ya kusonama, ‘Muntu ke zinga kaka na dimpa ve.’” Credo ya beno, mpe nyonso yina. Kasi na nzila ya yinki? Ndinga nyonso! Kitini ya Ndinga? “Ndinga nyonso yina ke basika na yinwa ya Nzambi.” Ya kele na nzila ya yina muntu ke zingaka. Beno me mona? Mwana-dimememekamaka, beno tala kana ya kele kisika nyonso Yandi me kubwaka.

¹⁶³ Ba-Pharisien, “O Rabbi, Nge Profete ya ntwenia, beto ke banza ti Nge kele mbote. Nge kele mbote.”

¹⁶⁴ “Samu na yinki nge ke bokila Munu Muntu ya mbote? Ya kele kaka na Mosi yina kele mbote, mpe ya kele Nzambi. Nge ke kwikila yawu?”

¹⁶⁵ “Oh, yinga. Nzambi.”

¹⁶⁶ “Mbote, mu kele Yandi, kuna.” Uh-huh. “Nge tubaka ti ya kele kaka na Mosi ya mbote. Samu na yinki nge ke bokila Munu ‘muntu ya mbote,’ na yina nge ke kwikila ve ti Mu kele Nzambi?” Uh-huh. “Na yawu samu na yinki nge ke bokila Munu muntu ya mbote? Yinki ke sala ti beno sala mutindu yina? Yinki me twadisa nge na kimpeve na kutuba yawu, ntangu beno zaba ti ya kele kaka na mosi ya mbote, mpe ya kele Nzambi?”

¹⁶⁷ “Beto zaba ti Nge ke zitisaka ve lukumu ya muntu to ndinga ya ntelamanu ya bawu. Beto zaba yawu.” Beno meka... Yandi zabaka muntu ya luvunu yina. Beno me mona?

¹⁶⁸ Yandi mekamaka samu na kutala kisika Yandi vwandaka ya kutelama, beno me mona, ya kumekama na mutindu nionso, ya kumekama mutindu beto kele ya kumekama. Kasi ya vwandaka ve na mutindu ya kuyambula, samu na Yandi, ata fyoti. Ve, tata! Yina vwandaka Mwana ya Nzambi.

¹⁶⁹ Mpe mwana-dimeme mekamaka, mpe ba bumbaka yandi bilumbu kumi na yiya. Yina vwandaka Saba zole, to bansungi zole. Mosi kele samu na ba-Juif, yina bawu pesaka mwana-dimeme na kifwanukusu; mosi kele samu na Bantu ya makanda, yina kele na Mwana-dimeme ya kieleka, mpe bawu nyonso kumaka ya kulunga na kukwikilaka ti Mwana-dimeme yayi ke kwiza. Kasi ba mekaka Yandi kumi na yiya... to fyongoninaka bilumbu kumi na yiya, Yandi vwandaka Ndinga.

¹⁷⁰ Mpe beno lenda fyongonina Ngwisani ya Ntama, beno ke tuba “Ya ke fundisa ya Malu-malu.” Beno kele na foti! Ngwisani ya Ntama ke pesaka kaka kimbangi ya Malu-malu.

¹⁷¹ Bakala mosi zolaka telemina munu ntama mingi ve, yandi tubaka, “Wapi dyambu na yandi?” Yandi tubaka, “Mbote, yandi ke longaka mpe na Ngwisani ya Ntama.” Mulongi ya Muklisto, beno banza na yawu. Yandi tubaka, “Ngwisani ya Ntama kufwaka mpe zimbanaka.” Oh, ve! Oh, ve! Ya kele kaka mulongi

ya lukolo, samu na katalisa beto yina ba sonikaka na zulu ya kibaka. Beno me mona? Ya kele kieleka.

¹⁷² Ntangu yayi, beno me mona, bilumbu kumi na yiya ba mekaka yawu, ya vwandaka Klisto. Ntangu yayi beno tala, kuna ba kufwaka yandi na ntangu ya nkokila, ba zolaka kufwa yandi, mwana-dimeme. Klisto kufwaka na ntangu ya nkokila, na manima ya midi. Mpe na manima beno tala, kuna yandi vwandaka mpe . . .

¹⁷³ Ba zolaka tula menga na zulu ya makunzi ya kielo, beno me mona, yina menga kele lusingu ya kibulu. "Nge ke kudya nsuni ya yawu; kasi menga ya yawu yina kele lusingu, mwangisa yawu." Beno me mona? Ya zolaka vwanda . . . Ba zolaka tula menga na linteau ya kielo ya yinzo kisika ba ndimaka munkayulu. Nkembo! Yinki kele Luzingu? Nkumbu. Ti . . . Yandi tulaka nkumbu ya muntu yango . . . Beno kwenda na kielo, mpe beno tala, beno tala nkumbu yina kele na zulu ya kielo na ntwala beno bula ngunga. Beno me mona? Ba tulaka menga na linteau ya kielo mutindu kifwanukusu ya munkayulu vwandaka na kati.

¹⁷⁴ Ntangu yayi beto ke mona kisika ya kusambila, kaka na kati kuna, na kulutaka na kati ya Menga yina. Beno tala, menga na kielo vwandaka zonza nkumbu ya yina vwandaka salama . . . vwandaka na kati, bawu vwandaka na kati kuna. Kisika ya beto ya kusambila, Mwana-dimeme, kele Ndinga. Beto zaba yawu.

¹⁷⁵ Ntangu yayi, nzila ya 4, beno tala, "Beno bika dimpa ve, beno bika munkayulu ve," to, beno baka ve mosi na nsungi mosi na yankaka.

¹⁷⁶ Beno meka na kuvutuka mpe beno tuba, "Mbote, ntangu yayi, beto kele bantu ya Luther, beto zola kukwiza awa," beno fwana kufwa na nsungi ya ba-Lutherien samu na kubutuka na nsungi ya Wesley. Beno fwana kufwa na nsungi ya Wesley samu na kubutuka na nsungi ya Pentecote. Mpe beno fwana kufwa na nsungi ya Pentecote, beno bika kima mosi ve ya yawu kubikana, beno yoka yawu na tiya, samu ti ya ke yokama na tiya mutindu mwinga yina blé basikaka. Mwinga, denomination, ya fwana kuyokama na tiya. Na yawu beno nata ve denomination ya beno na Nsangu ya malu-malu. Yayi kele Ndinga ntangu yayi. Yawu yina nataka denomination, mwinga; yawu nataka Yawu, ya kieleka; kasi Yawu kwisaka *awa*, na manima mwinga kufwaka. Ya vwandaka munati, denomination, kasi Ndinga me landila kaka. Yinga, Ndinga me landila kaka.

¹⁷⁷ Ntangu yayi beno baka nzila ya 5 mpe nzila ya 6. Beno tala, "Ve . . ." Ntangu yayi beto baka nzila ya 5 mpe nzila ya 6.

Nge lenda pesa ve munkayulu ya paki na mosi ya mielo, yina MFUMU Nzambi ya nge me pesa nge:

¹⁷⁸ Ntangu yayi beno bambuka moyo, "Ve na mosi ya myelo yayi." Mfumu ke pesa beno muswa ya kuzwa ba-dénomination yayi, beno me mona, "myelo yayi."

Kasi na kisika yina MFUMU... Nzambi ke sola na kutula nkumbu ya yandi, . . .

¹⁷⁹ Ya kele Mwelo, kisika mosi kaka. “Ve na kati ya myelo yayi.” Kasi Nzambi kele na Mwelo.

¹⁸⁰ Beno ke tuba, “Konso suka mu ke kotaka na mwelo ya ba-Methodiste.” Ya kele dibuundu. “Konso suka mu ke kotaka na mwelo ya Katolika.” Uh-huh. Mbote, Mfumu bika bantu ya Yandi kukota mpe kubasika na myelo yina. Nzambi kele na bantu na dibuundu ya Katolika, dibuundu ya ba-Methodiste, dibuundu ya ba-Presbytérien, bawu nionso, ba-Pentecotiste. Kieleka, kasi ve . . . beno ke sambilaka ve Mfumu na mwelo yina. Beno me mona? Kasi Mfumu kele na mwelo mosi. Nkembo! Yandi kele na mwelo.

Kasi na kisika yina MFUMU Nzambi ya nge . . . ke sola na kutula nkumbu ya yandi na kati, kuna . . . nge ke pesa munkayulu ya paki na nkokila, . . .

¹⁸¹ Na wapi ntangu Rébecca monaka Isaac? Na wapi ntangu Éliézer bokilaka yandi samu na kuvwanda kento ya makwela? Na ntangu ya nkokila!

Ya ke vwanda na Nsemo na ntangu ya nkokila,
Beno ke mona kieleka nzila ya Nkembo;
Na nzila yango ya maza kele Nsemo bubu yayi,
Ba me zika na Nkumbu ya ntalu ya Yesu.
Ntwenya mpe kuluntu, beno funguna masumu
ya beno nyonso,
Kieleka Mpeve-Santu ke kota;
Bansemo ya nkokila me kwiza,
Ya kele dyambu ti Nzambi mpe Klisto kele
mosi.

¹⁸² Yina vwandaka mbandukulu ya Yawu, ntangu yayi yandi me fuluka na Nsemo ya Kento ya makwela. Beno me mona yina mu zola kutuba?

¹⁸³ Mu ke sala mbote na kusukisa awa, samu na kubanda dyaka na nkokila yayi, samu ti mu zola ve ti beno kondwa yayi, beno me mona. Ve, ve, ya kele—ya kele ntangu ya madia ya midi. Mbote, mbote, mu kele na banoti mingi awa. Oh, la la! Wapi mutindu samu na nkokila yayi, ya ke vwanda mbote mingi? [Dibuundu me tuba, “Ve. Ntangu yayi.” —Mu.] Huh? Mbote, kana beno . . . Beno zola kaka kumeka mwa ntama fioti? [“Yinga. Amen.”] Mbote mingi, beto kwenda mwa ntama fioti ntangu yayi, beto ke sala nswalu. Wapi mutindu?

¹⁸⁴ Ntangu yayi, beno kota na yinki? “Beno ke kwenda ve na mwelo yina Mfumu Nzambi me pesa beno, kasi na mwelo yina Mfumu ke tula Nkumbu ya Yandi.” Beno kota ve na yinzo ya—ya mwelo yina kele kielo. Ya kieleka? Nzambi ke tula Nkumbu ya Yandi na kielo, mpe beno ve . . . Ya kele mwelo yina ke kotaka na kisika ya kusambila, sanctuaire. Beno ke kota kuna ve na

munkayulu ya beno na myelo yayi, kasi na mwelo yina Mfumu Nzambi soolaka na kutula Nkumbu ya Yandi. Beno me mona?

¹⁸⁵ Ntangu yayi, Yandi salaka yawu? Wapi kisika kele Mwelo yango? Na Santu Jean 10, Yesu tubaka, “Mu kele Mwelo, Kielo. Mu kele Kielo ya Yinzo ya Nzambi. Mu kele Kielo ya lupangu ya mameme.” Lupangu ya bankombo ve, lupangu ya mameme. Beno me mona? “Mu kele Kielo ya lupangu ya mameme. Muntu lendaka kota na Kielo yayi, kuvwanda na lukengolo.”

¹⁸⁶ Mpe ntangu yayi beto lenda telama ntangu ya yinda na zulu ya yawu. Kasi, samu na kunwanina ntangu, Yandi kele Kielo ya lupangu ya mameme yina. Ntangu yayi, beto zola bakula awa, bivudi mpe bifwanukusu kele kieleka na kutalana kaka awa, kasi mu . . . kana mu baka page yina mu ke . . . ya ke kanga beno mwa ntangu fyoti.

¹⁸⁷ Mbote mingi, beno tala, yayi ke talisa pwelele na mutindu ya kulunga, Yesu Klisto. Samu ti Ngwisani nyonso ya Ntama kele kifwanukusu ya Yandi, bafeti nyonso, bakusambilna nyonso, mpe nyonso. Mpe mu me sonika yawu awa, na yisi ya nzila yayi ya Masonuku, “Tendula yawu.” Ya kele kisika ya ke baka ntangu mingi. Tendula mutindu bafeti nyonso . . . Mpe dikabu ya faline vwandaka kifwanukusu ya Klisto. Beto baka kaka yawu.

¹⁸⁸ Kilumbu mosi ya vwandaka na lukolo yina ba me bokila lukolo ya balongi, to lukolo ya baprofete. Bawu longusaka, baprofete yina longokaka. Mpe ya vwandaka na profete ya kieleka, yina Nzambi bokilaka kilumbu mosi yina kwendaka kutala bawu. Mbote, ba vwandaka zola kutilisa profete yayi ya kiboba mwa lutondo, mosi ya bawu basikaka mpe lokotaka divala ya nene yina yandi banzaka ti ya vwandaka ba-pwa; kasi ya vwandaka matiti ya ndikila, mpe yandi zolaka pesa bawu madia na yawu.

¹⁸⁹ Oh! Bamadia yikwa ya seminere yina beto me kudia! Beno me mona? Kieleka. Ba ke na kulamba kima mosi. Beno me mona? Bawu kele na madia ya ba-Methodiste, madia ya ba-Baptiste, madia ya ba-Pentecotiste. Kasi, beno me mona, ya kele kukula ya zole, mutindu ba lenda katula yawu na yinti. Beno me mona, ve na Vinu ya ngudi. Yina ke butaka malala ya ngayi, pamplemousse, mpe nyonso yina; ve malala, kasi ke tubaka ti ya kele yinti ya malala.

¹⁹⁰ Beno tala dyaka. Ntangu yayi, na yayi—na yayi, ntangu Elie kwizaka mpe talaka bawu, mpe monaka ti ya vwandaka matiti ya ndikila yina ke kufwa bawu nionso, ba tubaka, “Oh, lufwa kele na kati ya nzungu!”

¹⁹¹ Yandi tubaka, “Natila munu ndambu ya faline.” Mpe yandi losaka faline na kati ya yawu, yandi tubaka, “Ntangu yayi ya kele nyonso ya kulunga, beno kudya yina beno zola.” Ya sobaka lufwa na luzingu.

¹⁹² Mpe dikabu ya faline yina pesamaka na Klisto... Yandi vwandaka dikabu ya Faline, mpe dikabu ya faline fwana nikama na masini mosi na mutindu ti konso ndambu ya faline vwanda mutindu mosi, yina ke lakisa ti Yandi kele mutindu mosi mazono, bubu yayi, mpe kukonda nsuka. Yandi kele kima mutindu mosi ya kutula na kati ya denomination ya beno mpe yawu ke zinga: Ndinga! Klisto kele Ndinga, bifwanukusu nyonso ya bima: tabernacle, dimpa ya musiku, nyonso. Dimpa kascher yina ba bukaka na plato vwandaka nzutu ya Yandi yina bukana, ti ba-Juif lenda tendula yawu ve samu na yinki ba salaka yawu. Beno me mona? Mpe bima nyonso yankaka yayi vwandaka fwanikisa Yandi.

¹⁹³ Ntangu yayi, na yina, Yandi na kutala, beto ke mona ntangu yayi ba-denomination nyonso mpe ba-credo nyonso me bikana na manima; samu ti Yandi kele Ndinga ya Nzambi ya kieleka, yina ke sobaka ve, yina kele dimpa ya kukondwa levire, Santu Jean 1. Ya kele kieleka, Yandi kele Dimpa ya kukondwa levire. Na yawu ntangu beno ke bwela *yayi* to ke bwela *yina*, ya kele kima ba me bwela na Yawu yina yimeni pesamaka na beno.

¹⁹⁴ Beno tala awa. Yinki ke na kufwa bantu bubu yayi? Ba ke baka mpe ke vukisa bima. Mpe ntangu beno ke vukisa yawu, beno ke kufwa yawu. "Oh, ya ke talana kitoko mingi." Kieleka! Disangu ba me vukisa: bisikwiti ya disangu, ba-céréale nyonso yankaka yina me basika na disangu. Disangu ba me vukisa: masangu ya nene, ya nene, ya yinda, mpe makutu ya nene, ke talana mutindu bambala zole mbote mutindu yina yankaka. Kasi ya kele lufwa! Science mpe me mona yawu. Beno me mona? Beno vukisa yawu ve, ya ke kufwa beno.

¹⁹⁵ Ntangu yayi, awa, beno bika mu talisa na beno. Kilumbu yina mu vwandaka mwangisa masa na mwa bafelele na kati ya lupangu ya munu. Mpe mama yango vwandaka na bafelele yina ba me vukisa yina vwandaka na kati ya nzungu awa, to mwa mukala mosi na lweka ya yinzo. Beto fwana mwangisa yawu masa na kutala bambala tatu na sabala mosi, to yiya, to yawu ke kufwa. Mpe kuna vwandaka yinti ya ntete kuna na kati ya lupangu. Ya nokaka ve kuna bangonda sambanu, ya vwandaka kaka ya kuyuma... Kana ya me noka, na minuti kumi beno lenda mona putulu ke mata. Kasi mwa yinti yina kuna, vwandaka kaka kitoko mingi mpe kitoko mingi kulutila yina ba me vukisa vwandaka na maza nyonso. Beno katula masa yina na zulu ya yandi, yandi ke kufwa. Kasi wapi kisika yandi bakaka masa ya yandi? Mpe kima yankaka, beno fwana tula yawu mupepe na kilumbu mosi to bilumbu zole, samu na kukeba yawu na banzinzi. Kana ve, banzinzi ke kudia yawu, ya ke ya kulemvuka mpe ya lembami. Kasi ya kele ve na nzinzi yina ke vwanda na zulu ya yinti yina ya kisina. Ve, ve! Yandi ke mata na zulu ya yandi mpe ke kwenda. Yandi kele ya kisina! Beno me mona yina ke kuvukisa bima me sala?

¹⁹⁶ Ya kele kima mutindu mosi na dibuundi. Bawu ke meka na kuvukisa denomination na Ndinga, samu na kusala . . . samu na kumeka kusala ti Ndinga kutuba yina denomination me tuba. Mpe ntangu beno ke sala yawu, beno fwana tula yawu mupepe, mpe kubondila yawu, mpe—mpe kupesa bawu bambwetete ya wolo samu na kukwiza na lukolo ya Lumingu, mpe nyonso yankaka. Ya kele kieleka. Ntangu, Muklisto ya kieleka, yina me butuka mbala zole, yina me butuka na Ndinga ya Nzambi, yandi kele na ngolo. Ya kele beno. Banzinzi mpe bima ya yinza ke yangisa yandi ve. Yandi kele ngononi, yandi ke pumbuka na zulu ya yawu. Beno me mona, yandi ke pumbuka na mazulu. Beno me mona? Ya kele kieleka. Kima mosi ve . . .

¹⁹⁷ Beno tala. Ntangu yayi, beto fwana bakula yawu awa, denomination, ba-credo, mpe nionso yina ba me bwela na dimpa ya levire lendaka ve kuvukana na dimpa ya kukondwa levire. Mpe Biblia ke tuba na ntwala awa na kisakramento, samu na kukwenda na bisambu, ti ata levire mosi ve lenda kota na beno, mpe Nzambi ke yamba yawu.

¹⁹⁸ Beno ke tuba, "Mu kele Methodiste." Kaka kuna beno ke kufwa! "Mu kele Pentecotiste." Beno ke kufwa!

¹⁹⁹ Mu kele ya Klisto. Ya kele kieleka. Beno fwana kutelama na zulu ya kima mosi. Ya kele kieleka. Beno kele—beno kele ya kutelama na zulu ya kima mosi.

²⁰⁰ Churchill tubaka kilumbu mosi, telemisaka misapi zole mpe tubaka, "Beto kele na lunungu." Mpe Angleterre kangamaka na zulu ya yawu, bawu kwikilaka Churchill.

²⁰¹ Mpe beno kwikila yawu to ve, na suka yayi, beno me telema pene-pene ya kima mosi. Ya kele kaka na kima mosi yina beno lenda zinga mpe kutelama, mpe ya kele Klisto, Ndinga. Kieleka!

²⁰² Beno tala, kima ve na kati ya Biblia ke fwanikisa ba-denomination kasi Babylone. Mpe ba tungaka Babylone na Nimrod, mpe Nimrod vwandaka kimpumbulu. Mpe yandi vwandaka na nkonga ya bakento na kati kuna, yina zolaka vwanda bantinu ya yandi ya kento, yina vwandaka profete ya kento. Bawu ke banzaka mpe ti Balaam ya ntama katukaka na lweka yina, bawu vwandaka na misisa mpe nyonso yina. Bawu vwandaka sambilia, beno zaba (mingi ya beno bantu ya mayela mingi yina vwandaka tanga *Les Deux Babylones* ya Hislop, mpe nyonso yina, mpe disolo ya dibuundu), mpe mutindu bawu—bawu salaka. Mpe ba vwandaka na bakento yina vwandaka sala *yayi*, mpe bakento . . . nzambi ya kento, mpe nyonso, mpe ya vwandaka nsambulu yina ba vwandaka tuma na ngolo nyonso. Muntu nyonso, mbanza nyonso na Babylone zolaka kwiza na Babylone samu na kusambilia na yisi ya Nimrod na yinzo ya yinda. Beno me mona? Ya kele kieleka. Ba vwandaka kwika bawu na kusala yawu, samu na Kubondila. Ya kele kisika potopoto ke kwizaka.

²⁰³ Mpe ya kele kieleka yina dibuundu kele bubu yayi, “Kana beno kwenda ve na lukolo ya Lumingu, kana beno sala *yayi* ve, mpe beno fwana sala *yayi* mpe kusala *yayi* mpe kusala *yina*, beno kele na ngaanda ya tablo.”

²⁰⁴ Kuna na Tucson, ke na kuwa na suka yayi, mu vwanda kumiyufula mbala mosi... Mu ke pusaka bantu ntangu nionso, “Beno kwenda na yinzo-Nzambi, ata kisika beno ke kwenda.” Mpe mu monaka bantu mutindu ya kubenda na manima, mpe kukwenda na lweka *yayi*. Mpe mu banzaka, “Yinki kele diambu?”

²⁰⁵ Mu kwendaka na bayankaka ya bawu, “Kilumbu ya ntete nge kele kuna, ba ke belama na nge, ‘Kota na dibuundu ya beto.’ Kana beno sala yawu ve, beno ke yambaka beno ve.” Beno me mona? Beno me mona? Ya kele kima yina ba me tuma na ngolo nionso, ba me tuma yawu na zulu ya beno, beno me mona, mpe ya kele Babylone. Kasi na Klisto, beno ke kota na nzila ya nsodolo; ve na nzila ya ngolo, ntima ya beno ke benda beno na kati.

²⁰⁶ Nzambi tulaka ve Nkumbu ya Yandi na ntangu yina na Babylone. Beno kuwa mbote ntangu yayi. Yandi lenda ve kutula Nkumbu ya Yandi na Babylone, mabuundu. Oh, bawu, *bawu* tulaka Nkumbu ya Yandi na kati kuna, kasi Yandi ata mbala mosi ve. Ve.

²⁰⁷ Beno ke tuba, “Mbote, ntangu yayi, Mpangi Branham!” Beno vingila, beno vingila, beno vwanda kaka swi minuti. Nge me lomba munu na kuvwanda mwa ntangu dyaka. Beno lenda mona ve? Ntangu yayi beno tala, *ba* me tula Nkumbu ya Yandi na kati kuna, kasi Yandi ve.

²⁰⁸ Ntangu yayi, Yandi tubaka, “Kisika yina mu ke kutana na nge mpe ke yamba munkayulu ya nge kele kisika mu ke sola na kutula Nkumbu ya Munu. Beno ke kota na mwelo yayi, kyelo yayi kisika mu ke sola na kutula Nkumbu ya Munu. Ya kele kisika beno ke kwiza.”

²⁰⁹ Mbote, *ba* tulaka, “Yayi kele dibuundu ya Klisto.” Kana ya kele na kima yina kele mbote ve na kubwa yina, ya me bika mpova mosi: “mbeni.” Uh-huh, nyonso yina Yandi longaka, bawu ke wisanaka ve na Yawu. Ba-Pharisien ya bilumbu yayi.

²¹⁰ Kasi beto fwana mona kisika Yandi tulaka Nkumbu ya Yandi, samu ti na kati ya Yawu kele mwelo ya Yandi kaka yina ba kubikaka. Amen! Nkembo! Beno tala mbote! Wapi kisika Yandi tulaka Nkumbu ya Yandi? Na Mwana ya Yandi.

²¹¹ “Oh,” beno ke tuba, “ntangu yayi vingila fyoti, Mpangi Branham. Ya vwandaka Mwana, Tata ve.”

²¹² Mwana ntangu nyonso ke bakaka nkumbu ya tata ya yandi na dyambu nyonso. Mu me kwiza na ntoto yayi na nkumbu ya Branham samu ti nkumbu ya tata ya munu vwandaka Branham.

²¹³ Yesu tubaka, “Mu me kwiza na Nkumbu ya Tata ya Munu, mpe nge me yamba Munu ve.” Beno zola Masonuku na zulu ya yawu? Santu Jean 5:43. Beno me mona? “Mu—mu me kwiza na Nkumbu ya Tata ya Munu, mpe nge me yamba Munu ve.” Na yina Tata tulaka Nkumbu ya Yandi Mosi, yina kele “Yesu,” na Mwana. Mpe Yandi kele Nzila, Yandi kele Kiello, Yandi kele Yinzo, Yandi kele kisika Nzambi solaka na kutula Nkumbu ya Yandi. Nzambi ata mbala mosi ve tulaka Nkumbu ya Yandi na kati ya munu, Yandi tulaka Yawu na kati ya dibuundi, Yandi ata mbala mosi ve tulaka Yawu na Methodiste, Baptiste, Katolika, kasi Yandi tulaka Yawu na kati ya Klisto Emmanuel ya Kupakula.

²¹⁴ Mpe Nkumbu kele na kati ya Ndinga samu ti Yandi kele Ndinga. Amen! Yinki Yandi kele na ntangu yina? Ndinga yina me tendula kele kumonisama ya Nkumbu ya Nzambi. Kukondwa ntembe. “Nsuni mpe menga ve me monisaka yayi na nge, kasi Tata ya Munu yina kele na Mazulu me monisa yayi na nge, Nani Mu kele. Mpe na zulu ya ditadi yayi Mu ke tunga kisika ya Munu ya kusambil, mpe bankotolo ya difelo lenda ve kuningisa Yawu.” Amen! O Dibuundi ya Nzambi ya moyo, kutelama na lufulu ya ngolo na zulu ya Yesu Klisto yandi mosi. Beno lenda yimba nkunga, kasi kana beno kele ve na zulu ya Klisto Ndinga, beno kele na mutindu ya mbote, na kubendaka zyelo. “Kasi na zulu ya Ditadi yayi,” Klisto, “Ndinga ya Munu.”

²¹⁵ Yandi tungaka nsangu ya ba-Lutherien mpe bawu salaka dénomination ya yawu. Ya kulaka, zuni. Na manima Yandi kulaka na dikulu, Methodiste, mpe nyonso yina. Ya kele kisika Yandi tungaka Dibuundi ya Yandi, na zulu ya Ndinga ya Yandi! Ntangu yayi, Yandi kele nyonso ve dikulu to mupende, Yandi kele nzutu; mpe ntangu yayi kele kitini ya nsongi. Beno me mona na ba-pyramide? Na yina, mu ke longaka ve nsambulu ya pyramide, ntangu yayi.

²¹⁶ Kasi Biblia ya ntete kusonamaka, kusonamaka na zulu, z-...[Kisika ya mpamba na bande—Mu.] Beno me bakula yawu? Ya bandaka na mwense, kidimbu ya ntete na zodiake. Kidimbu ya nsuka kele Leo nkosi. Yandi kwizaka ntete na nzila ya mwense, Yandi kwizaka na manima mutindu Nkosi ya dikanda ya Juda. Kaka ntete ti, nsungi ya cancer, mbisi ya kulunsi, bansungi nyonso yankaka. Kana beto vwandaka na ntangu ya kuzonzila yawu; yina kele na beto, na tabernacle.

²¹⁷ Mpe pyra-... pyramide na kuvwandaka bafondasio yayi, tii kuna na zulu na kivinga ya ntinu. Mpe kaka na ntewala beno kota na kibaka ya sambwadi, ya ke na nkotolo mosi ya fyoti kuna, kisika munati-nsangu ke kwisa samu na kunata beno na ntinu. (Munati-nsangu, Jean Mubotiki, yina pesaka nkumbu, na Ntinu.) Kasi ba losaka Ditadi ya yintu. Mpe bawu zaba ve, Ditadi ya Scone, to nyonso yina ya kele, bawu zaba ve kisika ya kele, samu ti ya kele ditadi yina ba losaka. Kasi ya kele ditadi yina tengaka kima ya muvimba, yina ke sala yawu pyramide na nzila

ya bansungi sambwadi ya dibuundu. Beno bwela lemvo, beno bwela *yayi*, beno bwela *yayi*, ya kele na bitezo sambwadi, ya nsuka kele Klisto. Beno bwela *yayi* na zola ya beno, beno bwela lemvo, na lemvo ya beno kubwela kima yankaka, mpe kima yankaka, tii ya ke kuma na Klisto ya kele Ditadi ya yintu, “Mpe mu kele Kielo.”

²¹⁸ Ntangu yayi, mwana ntangu nyonso ke kwizaka na nkumbu ya tata ya yandi. Mwana nyonso ke kwizaka na nkumbu ya tata ya yandi. Mpe Yesu tubaka, “Mu me kwiza na Nkumbu ya Tata ya Munu.” Na yina yinki kele Nkumbu ya Tata? Yinki kele Nkumbu ya Mwana? Mpe Yandi tubaka, “Na mwa ntangu fioti yinza ke mona Munu diaka ve, kasi beno ke mona Munu.” Yandi ke na kwiza na mutindu ya Mpeve-Santu, Nkumbu mosi kele Yesu. Ya vwandaka samu na yina bawu vwandaka sambilia, “O Yesu!” Beno me mona? Beno me mona? Tata, Mwana, mpe Mpeve-Santu: Ya kele Mfumu Yesu Klisto. Kaka yina. “Mu me kwiza na Nkumbu ya Tata ya Munu, mpe beno me yamba Munu ve.”

²¹⁹ Ntangu yayi, beno bambuka moyo, Yandi bwelaka beto diaka awa mpe ke kebisa beto, “yankaka ke kwisa,” denomination mosi, credo mosi. “Bawu ke kwiza na nkumbu ya bawu mpe beno ke yamba bawu. Beno ke yamba Munu ve, Ndinga me siamisama mpe me talisama na ntwala ya beno.”

²²⁰ Mutindu Yandi vwandaka na ntangu yina, mutindu mosi Yandi kele bubu yayi. Beno kondwa yawu ve, bantu yina kele na yinsi yayi! “Yankaka ke kwiza, dibuundu mosi, mpe nge ke kwikila yawu, samu ti nge lenda sala kaka mutindu nyonso. Mu ke siamisa yawu ve.” Yandi kele ata fioti ve (na konso ntangu yina, me monaka ntete) kima mosi (na dibuundu mosi) na ngaanda ya Nsangu yina pesamaka: Luther, kunungisama; Wesley, kusantisama; Pentecote, kuvutuka ya makabu. Na manima... Mpe kaka na ntangu bawu ke sala dénomination na yawu, kuna yawu ke kufwa. Beno longuka Masonuku.

²²¹ Kasi Yandi tubaka, “Mu ke sola kisika ya kutula Nkumbu ya Munu.” Mpe Nkumbu vwandaka Yesu. Mpe Yesu kele Ndinga, Santu Jean 1. Ya kele kieleka? Ya kele kisika ya kusambilia, na kati ya Klisto Ndinga. “Mu me kwiza na Nkumbu ya Tata ya Munu.”

²²² Profete tubaka, “Nkumbu ya Yandi ke vwanda Emmanuel.” Ya kele Matthieu 1:23, kana beno zola kusonika yawu. Yesu, Yehowa, Mvulusi.

²²³ Ntangu yayi, nzila ya 5 ke lakisa ti Yandi kele Kielo. Na ntangu yayi, bimbangi mingi yankaka yina ke monikaka ve na meso, Mwelo yayi, mpe Nkumbu, mpe kisika ba lenda talisa ti ya kele kaka na kisika mosi yina Nzambi ke kutana na muntu samu na kusambilia, mpe ya kele ntangu yandi kele na kati ya Klisto.

²²⁴ Ntangu yayi, ntangu yayi kyuvu kele, “Wapi mutindu beto ke kota na kati ya Yandi?” Ntangu yayi, yayi lendaka tsokota

fioti; kasi, beno zaba, mutindu kubaka nkisi, kana ya ke sala beno kubela ve, ya ke sala beno mbote ve. Beno me mona?

²²⁵ Ntangu yayi, bantu ya Luther vwandaka zola kukota na mutindu mosi, na kuvukanaka na dibuundi ya ba-Lutherien. Ba-Methodiste zolaka kota na nzila ya kuboka. Ba-Pentecotiste zolaka kota na nzila ya kuzonza na bandinga. Ya kele dyaka yawu ve! Beno me mona? Ve, ya kele makabu, nyonso yina. Kasi ya Ntete ya Corinthiens 12 ke tuba, “Na nzila ya Mpeve mosi.” Mpeve ya Nzambi, yina kele mupesi-Luzingu na Ndinga (Nkuna), samu na kusiamisa Nkuna yina samu na nsungi yina. Beno me mona?

²²⁶ Beno tala nkuna ya ba-Méthodiste ya kuvwanda kuna, ya bakaka Mpeve-Santu samu na kusala ti nkuna yina kukwiza na luzingu mpe ya kuvedila...kuvedisa dibuundi na nzila ya kusantisama; Luther kulongaka yawu ve, samu ti yandi zabaka yawu ve. Ba-Pentecotiste zolaka kutuba na bandinga ya malumalu samu na kuvutula makabu. Mosi na mosi ke tuba, “Ya kele Yawu! Ya kele Yawu!” Beno me mona?

²²⁷ “Kasi na Mpeve mosi beto nyonso kele ya kubotama na kati ya Nzutu mosi,” mpe Nzutu yango kele dibuta, dibuta ya Nzambi. Mpe ya kele Yinzo ya Nzambi, mpe Yinzo ya Nzambi kele Nkumbu ya Yesu Klisto. “Nkumbu ya Mfumu kele Yinzo ya yinda ya ngolo, bantu ya kudedama ke kota na kati ya Yawu mpe kele na lukengolo.”

²²⁸ Ntangu yayi, wapi mutindu beno ke kota na kisalu? Wapi mutindu ba ke yamba nge na kutubaka ti, “Ba ke futa nge samu na—samu na Révérend, Docteur, Longi”? Beno me mona? Beno me mona? Beno lendaka vwanda révérend, docteur, longi. Kasi Nkumbu ya Mfumu kele “Yesu Klisto.” Beno me mona?

²²⁹ “Mu me sola na kutula Nkumbu ya Munu na kielo ya yinzo ya kusambila ya Munu, samu ti dibuta ya Munu ke vukana kuna na yisi ya Menga; mutindu ya vwandaka na Égypte, kima nyonso na ngaanda kufwaka. Mpe na kati kuna ya kele ve na dimpa ya kuvimba! Ya kele ve na ba-microbe na kati ya yawu bisika nyonso, yinzo ya Munu! Bana ya munu, yina me butuka na ba-gene ya Munu!” Amen! Nkembo na Nzambi! “Ba-gene ya munu kele na kati ya bawu! Oh... Mu tulaka Ndinga ya Munu na kati ya bawu. Mu ke sonika yawu na zulu ya bamesa ya ntima ya bawu. Ya kele dibuta ya Munu, dibuta ya Nzutu ya Yesu Klisto; dibuta. Mpe kielo yayi beno ke kota, Methodiste ve, Baptiste, to Pentecotiste, kasi na kielo sika wapi mu ke tula Nkumbu ya Munu.” Ya kele ve Methodiste. Nkumbu ya Nzambi kele ve Methodiste. Nkumbu ya Nzambi kele ve Pentecotiste. Nkumbu ya Nzambi kele ve Baptiste. Nkumbu ya Nzambi kele ve Katolika. Beno vwanda na ngaanda ya myelo kuna. Beno me mona? Beno me mona? Beno me mona?

²³⁰ “Kasi na kisika yina mu ke sola na kutula Nkumbu ya Munu.” Ntangu yayi, ya kele ve na kisika yankaka na kati ya Biblia yina pesamaka kisika ti Nzambi tulaka Nkumbu ya Yandi, kaka na Yesu Klisto, samu Yandi kele Mwana ya Nzambi yina ke baka Nkumbu ya Nzambi, mpe Nkumbu ya kimuntu ya Nzambi. “Mpe ya kele ve na nkumbu yankaka yina ba pesaka na yisi ya Mazulu na yina beno fwana kuzwa mpulusu.” Mu ke kipe ve, Methodiste, Baptiste, Presbyterien, cathechisme, to nionso yina beno zola kusala; kaka na Nkumbu ya Yesu Klisto kisika konso dibolongo ke fukama mpe konso ndinga ke funguna yawu, Yandi kele Mfumu. Ya kele mutindu beno ke kotaka.

²³¹ Mpe kana beno vwandaka kaka ya kubotama na maza kieleka—kieleka, mpe kuna kumanga Ndzinga, kuna beno kele mwana ya makangu; mbutukulu ya beno vwandaka ve ya kusungama. Beno ke tuba ti beno kwikilaka na Yandi kuna, mpe beno ke manga Yandi.

²³² Wapi mutindu mu lendaka manga dibuta ya munu? Na ntangu... Wapi mutindu mu lendaka manga ti Charles Branham kele tata ya munu? Kizama ya menga na kielo ke talisa yawu. Uh-huh.

²³³ Kisalu ya munu, mpe nsiamissa ya Ndzinga ya Nzambi na luzingu ya munu ke talisa ti mu kele mwana ya Nzambi to ve. Ntangu yayi, ya kele kaka kisika ya Nzambi. Beno me mona yawu? Kisika kaka yina Nzambi ke yamba munkayulu ya beno (Mu ke kipe ve mutindu beno kele ya kieleka) kele na kati ya Klisto.

²³⁴ Mpe beno bambuka moyo... Beno ke tuba, “Mbote, mu kwikilaka; mu me kwiza, mpe.” Beno bambuka moyo, Biblia ke tuba... Beno ke tuba, “Mbote, Biblia ke tuba, ‘Muntu nyonso yina ke kwikila ti Yesu Klisto kele Mwana ya Nzambi, ke kuzwa mpulusu, ke kuzwa mpulusu.’”

²³⁵ Ya ke tuba ti, kasi beno bambuka moyo ti ya kele *mpe* ya kusonama, *mpe* kele ya kusonama, “Muntu ve lenda bokila Yesu Klisto, kaka na nzila ya Mpeve-Santu.” Beno me mona? Beno lenda tuba “Yandi kele,” kasi Yandi kele ve tii Mpeve-Santu Yawu mosi, yina ke pesaka Luzingu na Ndzinga, ke talisa yawu na nzila ya kimbangi ti beno kele mwana ya Nzambi. Ya kele Masonuku.

²³⁶ “Kisika yina mu soolaka na kutula Nkumbu ya Munu. Beno ke sambilaka ve na mwelo mosi yankaka, kasi na mwelo Mu tulaka Nkumbu ya Munu na kati; na yina mu ke yamba beno, beno kele na dibuta ya Munu.”

²³⁷ Ntangu yayi, dibuta ya Nzambi ke tumama na ndonga ya Tata ya dibuta. “Mpe Yandi kele Ntinu ya Ngemba, Nzambi ya Ngolo nionso, Tata ya kukonda nsuka; mpe ya luyalu ya Yandi mpe kuyala ya ke vwanda na nsuka ve, luyalu ke vwanda na zulu ya mapeka ya Yandi.” Mpe Yandi na kuvwandaka Muyadi, Ntinu,

Emmanuel, ya Ntete, ya Nsuka, Ntinu ya Ngemba, Nzambi ya Ngolo nyonso, Tata ya kukonda nsuka, mosi na mosi ya bana ya Yandi tumama na konso Ndinga samu ti bawu kele kitini ya Yandi.

²³⁸ Beto ke zinga na yinzo ya beto mutindu ba-Branham ke zinga. Beno ke zinga na yinzo ya beno, ba-Jones, mutindu ba-Jones ke zinga.

²³⁹ Mpe na Yinzo ya Nzambi beto ke zinga na nzila ya Ndinga ya Nzambi mpe konso Muntu yina ke basika na yinwa ya Nzambi; mpe muntu nyonso yankaka, ya luvunu, beto ke kuwa yandi ve. Beno me mona? "Nge ke kudya Dimpa ya kukondwa levire, konso nsungi ya dibuundu, kaka mutindu mu pesaka Yawu na nge." Kasi beno meka ve na kuvutuka mpe kukotisa yawu na Yayi, samu ti ya me kuma na mwinga. "Beno ke baka mikwa mpe bima yina me bikala na zulu ya munkayulu mpe ke yoka yawu!" Me kwenda, nsungi ya dibuundu me kufwa, me landila; beto kele na mosi yankaka ntangu yayi. Amen!

²⁴⁰ "Kisika mu ke sola na kutula Nkumbu ya Munu na kati." Oh, la la! Corinthiens ya Ntete kapu 12.

²⁴¹ Beno tala, Éphésiens 4:30.

...beno nyongisa ve Mpeve-Santu ya Nzambi, na yina beno kutulamaka kidimbu tii na... (réveil yina ke landa?)... tii na kilumbu ya beno ya mpulusu.

...beno nyongisa ve Mpeve-Santu ya Nzambi, na yina beno kutulamaka kidimbu tii na kilumbu ya beno ya mpulusu.

²⁴² Ntangu yayi beno tala. Beto tula yawu na leso ya beto ya Masonuku. Na yina beto ke sala mbote na kukwenda; mu banza ti mu ke lembisa bantu. Beno me mona? [Muntu mosi me tuba, "Ve, nge kele ve, Mpangi Branham."—Mu.] Beno tala awa, bantu ke telama mpe ke vutuka na yinzo, beno me mona, na yina madia ya bawu—ya bawu ya midi ke na kupia, mpe ba ke zola kukutana na muntu mosi. Bawu vwandaka vingila ve na kukwiza awa samu na kuwa bilumbu nyonso. Beno me mona? Kasi, beno tala, beno zaba...

²⁴³ [Mpangi Ben Bryant me tuba kima mosi—Mu.] Ben, oh, mu fwana sala na zulu ya nge! Lusakumunu ya nge! Matondo na nge, Mpangi Ben. Mu zola nge, Mpangi Ben.

²⁴⁴ Kana beno zaba yina mwana ya bakala yina talaka mpasi samu na beto na mvita yina; yandi me pasuka bitini-bitini nionso, mpe me pasuka, mpe nionso yina. Yandi kele na luzingu ya bima nyonso, kasi Nzambi kele ya kusakumuna yandi. Yandi ke vwanda kieleka. Kento ya yandi bikaka yandi, kwendaka mpe kwelaka dyaka, mpe bakaka bana ya yandi. Oh, la la, mu lenda banza kaka ve na yawu.

²⁴⁵ Kasi, na mutindu nionso, Nzambi sakumuna nge, Ben.

²⁴⁶ Yandi kele awa ya kufuluka na minzenzi ya ba-obus, yina ke na kupusa misisa ya yandi mpe nionso yankaka. Na yina, beno fwana zaba lufulu ya bima, beno me mona. Nzambi sakumuna mwana ya bakala yina. Yinga.

...na yina ba me tula beno kidimbu tii na kilumbu ya
beno ya mpulusu.

²⁴⁷ Beno tala! Ntangu yayi, yayi lendaka zibuka kaka mwa fyoti, kasi beno tala. Beno dasukila munu ve. Beno bambuka kaka moyo.

²⁴⁸ Ntangu Israel talaka na kielo yina, na menga yina na kielo, nkumbu (menga, luzingu), mpe kotaka na yisi ya menga yango, bawu basikaka dyaka ve tii bawu basikaka na Égypte.

...beno nyongisa ve Mpeve-Santu ya Nzambi, na yina
beno ke kota mpe beno ke basika dyaka ve tii na
kilumbu yina beno ke kuzwa mpulusu. (Beno me mona?)

²⁴⁹ Beno zaba, Biblia kele ntangu nyonso ya kusungama. Yandi tulaka Bandinga na kati Kuna, beno fwana tula Yawu na kisika Yawu ke kwenda, samu na kusala Yawu, kusala kizizi nyonso ya mpulusu. Beno me mona? Beno me mona?

...beno nyongisa ve Mpeve-Santu ya Nzambi, na yina
beno kutulamaka kidimbu tii na mpulusu ya beno. (Tii
beno ke kuzwa mpulusu.)

²⁵⁰ Beno kele ya kutula kidimbu na kati kuna, beno kele na yisi ya Menga. Beno ke basika dyaka ve. Mpe na manima yinki beno kele? Mwana ya Nzambi na kati ya dibuta ya Nzambi, ya kutula kidimbu na Mpeve-Santu. Dyabulu zolaka ve kuzwa beno kana yandi zolaka; samu ti beno kele ya kufwa, bakala ya beno ya kiboba kele ya kufwa; mpe ba me zika beno, mpe luzingu ya beno kele ya kubumbama na kati ya Nzambi na nzila ya Klisto, mpe ya kutula kidimbu na nzila ya Mpeve-Santu. Beno me mona? Wapi mutindu yandi ke kuzwa nge? Wapi mutindu nge ke basika? Nge kele kuna! Nkembo! Ntangu yayi mu ke bika yawu swi; kaka mingi samu beno kuzaba yina mu ke na kutuba.

²⁵¹ Na yina luvangulu ya malu-malu, kele ve samu na denomination kasi na Ndinga. Beno kele kivangu ya Ndinga. Samu ti ditadi ya lufulu kutulamaka na kati ya beno ntete mbandukulu ya yinza, yina ba soolaka na mantwala samu na kuvwanda bana-babakala mpe bana-bakento ya Nzambi.

²⁵² Mpe na zulu ya ditadi yayi me basika na zulu ya ditadi, na konso nsungi, samu na kusiamisa Ndinga yina ke na kwisa, kaka kieleka mutindu Yesu salaka na nsungi ya Yandi, yina kele Ditadi ya nsongi ya yawu nyonso. Na kati ya Yandi tulaka nsungi nyonso. Na kati ya Yesu vwandaka Moise. Na kati ya Yesu vwandaka David. Na kati ya Yesu vwandaka baprofete. Ya kieleka? Beno tala Joseph, yina ba tekaka na kutala makumi tatu ya mpata, yina ba losaka na kati, yina zolaka kufwa, yina

ba zolaka katula, yandi kwendaka mpe kwisaka na diboko ya kibakala ya Pharaon. Beno tala, ya kieleka, Yesu vwandaka... Joseph vwandaka na kati ya Yesu.

²⁵³ Mpe ntangu Yandi kwizaka, Yandi vwandaka muvimba ya bantinu, baprofete (alleluia), Bunzambi na nzutu kupemaka na kati ya Yandi. Yandi kwizaka samu na kuvulusa kuna Kento ya makwela, Kisalu ya kulunga. Kisalu ya kulunga yina ke tubaka na Satana ti...

²⁵⁴ Ntangu yandi tubaka, "Bilumbu ya bimangu me luta. Ya kele ve na kima mutindu bima yayi yina beno ke na kuzonzila."

²⁵⁵ "Katuka pene-pene ya munu, Satana." Beno me mona? Beno me mona, Kisalu ya kulunga ya kutelama mpe ke keba.

²⁵⁶ Ntangu yankaka Ditadi ya yintu ke yutuka, Yintu ya nyonso ya yawu, mpe ke yamba Kento ya makwela na Yandi mosi; yawu yina ba basisaka kento na bakala, kitini ya bakala. Konso... Ba-Gene ya bakala kele na kento, yinki ke sala kento. Mpe ya kele mutindu Ndinga ya Nzambi kele na kati ya Dibuundu, yinki ke salaka Dibuundu Kento ya makwela. Denomination ve, yina kele ya diabulu, bawu nionso. Mu ke na kubokila ve bantu na kati kuna yina; ba kele bampudu bantu ya luvunu, mutindu Yesu tubaka, "Mpofo ke na kutwadisaka mpofo." Mpe Yandi lendaka ve kubokila bawu na kubasika.

²⁵⁷ Mpe bawu tubaka, "Samu na yinki, beno me butuka na kindumba! Nani ke tuba na nge ti bawu ke kwiza na nge? Wapi lukolo, wapi seminere me zaba nge?" Yandi tubaka, "Beto kele na Moise. Beto zaba..."

²⁵⁸ Yandi tubaka, "Kana beno zabaka Moise, beno zolaka zaba Munu."

²⁵⁹ Samu Moise sonikaka Yandi na babuku yiya ya yandi, "Mfumu Nzambi ya beno ke basisila beno Mupesi ya Ndinga, to, Profete, mutindu munu, mpe yina ke kuwa ve ti ba ke katula Profete yina na kati ya bantu." Kaka yina ya kele samu na yawu. Mpe yinki Yandi kele? Ndinga. Mpe yinki Yawu kele? Beno bika ata levire ve na... ya beno... beno tula ve levire na kati ya Yawu. Beno bwela ve credo mosi, denomination mosi, samu ti ya kele ya kubeba kaka kuna, munkayulu ya beno me suka.

²⁶⁰ Beto sala nswalu ntangu yayi, na nswalu nionso, samu beno kwenda kudia.

²⁶¹ Beno tala! Ntangu yayi, na yina, beno kele mwana ya Nzambi, na yinzo ya Nzambi, beno kele kitini ya ekonomi ya Nzambi. Romans 8:1, "Na yina ya kele ve na kitumbu samu na bayina kele na kati ya Klisto Yesu." Samu ti bawu kele ya kufwa na yinza, ke zinga na kati ya Yandi, mpe ke zinga na kilumbu yayi, na kusalaka Ndinga yina Nzambi me sadila bawu, to me kubika bawu, na kutulaka nkumbu ya bawu na kati ya Buku yayi ya Kento ya makwela. Mpe ntangu Bamaza ke kwiza na zulu ya

nkuna yina kele na kati ya ntima, ke vumbula yawu na Kento ya makwela ya Klisto. Oh, la la! Kaka ya kulunga mutindu ya lendaka vwanda. Na konso nsungi ya vwandaka mutindu yina.

²⁶² Ba-Luthérien, na yisi ya kunungisama, makulu, me vumbula yawu mutindu yina; Wesley, na yisi ya kusantisama. Ba-Pentecotiste na nsi ya maboko, bisalu mpe bansalulu mpe nionso yina, zolaka vwanda ba-Calviniste...to zolaka vwanda ba-Arminien, zolaka vwanda bantu ya misiku. Kasi ntangu yayi beto me kuma na Yintu, Ditadi ya nsongi. “Lemvo! Lemvo!” Ditadi ya yintu bokaka.

²⁶³ Ditadi ya yintu ke na kudila yinki? “Lemvo! Lemvo!” Yandi lutaka lufwa mpe credo, na kati ya Ndinga ya Nzambi ya moyo. Dikani kaka ya Nzambi kubikaka samu na nsungi ya Yandi, Bana ya Yandi ya babakala na nsungi ya Ndinga me kindisama na Mpeve mutindu mingensi yina me pela na kima mosi samu na kupesa yawu luzingu; mpe kuvwanda ntangu yayi na bisika ya Mazulu (na ntangu yayi), kele yimeni moyo mpe kutumama na konso nsilulu na Ndinga. Na yina yinki ya ke sala? Beno kele kitini ya dikanda ya Nzambi, kitini ya Ndinga, bantu yankaka kitini ya Ndinga ya Nzambi, kuvwanda kintwadi, kutalisa Nzutu ya muvimba ya Klisto, samu ti ya kele ve na levire na kati-kati ya beno. (Beno me mona yina Yandi ke na kutuba, Mpangi Brown?) Ata levire ve na kati-kati ya beno, kaka Ndinga, me vwanda na bisika ya Mazulu, na kielo kisika Yandi tulaka Nkumbu ya Yandi: Klisto Yesu.

²⁶⁴ Ya kele ve kukota na kati-kati ya beno, yina ke nata muvimba ya bunzambi na nzutu na kati-kati ya beno. Ba lendaka ve kusala yawu na nsungi ya Luther, ba lendaka ve kusala yawu na nsungi ya Wesley, ba lendaka ve kusala yawu na nsungi ya Pentecote; kasi na kilumbu yina ntangu Mwana ya muntu ke monisama, me monisama pwelele, nataka Dibuundu kintwadi na Bunzambi ya muvimba ya Nzambi na kati-kati ya bantu ya Yandi, na kulakisaka bidimbu mosi yina ke monana pwelele, ke kukitalisaka Yandi mosi mutindu Yandi salaka na mbandukulu ntangu Yandi kumonisamaka na zulu ya ntoto na mutindu ya Nzambi-Profete. Oh! Nkembo! Silaka na Malachie 4, silaka na Masonuku yankaka. Wapi kisika beno ke sambilaka? Yinzo ya Nzambi, me vwanda (na ntangu yayi).

²⁶⁵ Ntangu yayi, na nswalu nyonso, beto tala kaka na nswalu nyonso ntangu yayi, mpe na manima kulandila...Na baminuti kumi beto ke kwenda, kana Mfumu zola.

²⁶⁶ Ntangu yayi beto tala ndambu yina me kindisama na yinzo yayi ya Nzambi, ya nsungi ya bawu.

²⁶⁷ Enoch! (Na baminuti kumi beto ke kwenda, kana beno lenda kaka kutala mpasi mingi.) Beno tala, Enoch vwandaka Ndinga ya moyo ya Nzambi ya nsungi ya yandi, yandi vwandaka profete.

²⁶⁸ Profete kele muntu yina ke lakisaka Nzambi. Bantu yikwa zaba yawu? Kitalisi ke kukitalisaka ve yandi mosi, kitalisi kele ve kutalisama. Ya fwana vwanda kima mosi ke bula kitalisi—kitalisi samu na kutalisa yawu. Na yawu profete kele vaze yina ba soolaka ya Nzambi yina lenda lakisa kima ve na nyonso kasi yandi kele na nzila ya kusungama na kutalisama yina, Nzambi, samu na kutalisa kizizi ya Klisto, Ndinga. Beno me mona, kima yankaka ve lenda sala yawu. Beno kele muntu yina ke lakisaka, ya kele samu na yina profete zolaka kudya buku. Ya kele samu na yina yandi zolaka kudya rulo. Yandi zolaka lakisa Ndinga yango samu na nsungi yina. Beno me kuzwa yawu?

²⁶⁹ Beno tala Enoch, Nzambi kele ya kulunga yina ke lakisaka na kifwanukusu. Ntangu Nzambi vwandaka na nzila—na nzila ya yandi, Yandi zangulaka kaka yandi, bakaka yandi. Mekaniki yina yandi talisaka kumaka dynamike na Mpeve, mpe zangulaka yandi.

²⁷⁰ Mutindu mosi na bilumbu ya Elie. Elie, ata mpe na mikwa ya yandi, kisika kutalisama yina... Kitalisi ya Nzambi na kati ya nzutu ya yandi yina me monisa Ndinga ya Nzambi. Ba me tulula muntu ya kufwa na zulu ya yawu, yandi me boka na luzingu diaka. Beto kele nsuni mpe mukwa ya Yandi, ntangu nyonso yina beto kele Kento ya makwela ya Klisto. Beno ke kwikila yawu? Mbote mingi. Yandi kufwaka samu na beto, mpe beto kufwaka samu na beto mosi mpe ba zikaka beto na Nkumbu ya Yandi, ti beto ke “vwanda diaka ve ya yinza, kasi na kati ya Yandi,” ya yina dibuta na Mazulu kele ya kubokila na manima ya Yesu Klisto. Ya kele Éphésiens 1:21. Samu ti nyonso zole Mazulu... dibuta na Mazulu. Yinki kele dibuta na Mazulu ya kubokila? Yesu. Yinki nkumbu kele na dibuta na zulu ya ntoto? Mbote, yina kele yinzo ya Nzambi kisika Menga kele. Ya kele kieleka? Ya kele kyelo, ya kele mwelo, ya kele kisika Yandi tulaka Nkumbu ya Yandi, mpe Ndinga kumaka nsuni mpe zingaka na kati-kati ya beto. Ya kele Ndinga yina ke kukitalisa mpe ke sema na nsungi yina beno ke na kuzingila. Ya kele yina Yandi vwandaka, ya kele yina Moise vwandaka, ya kele yina Jacob vwandaka, ya kele yina bayankaka ya bawu vwandaka, ke semisa Ndinga ya Nzambi yina, muntu ya kutalisa ti Nzambi vwandaka kukitalisa Yandi mosi. Mpe beno kwiza na kizizi yango ya kulunga ya Nzambi, Yesu Klisto, Kisalu ya kulunga ya Nzambi, Yina ba bulaka samu Yandi baka bayankaka samu na kusala Kento ya makwela yina vwandaka bitalisi.

²⁷¹ Moise vwandaka na kati ya Yandi. Josué vwandaka na kati ya Yandi. Mpe kana beno kele na kati ya Yandi, beno vwandaka na kati ya Yandi ntete mbandukulu ya yinza, dibuta ya Nzambi; beno monaka mpasi na Yandi, beno kufwaka na Yandi, beno kwendaka na kulunsi na Yandi, beno vumbukaka na Yandi; mpe ntangu yayi beno kele dyaka na Yandi, ya kuvwanda na bisika ya Mazulu, na kulakisaka Nsangu ya nsungi ya yinza, Nsemo

ya yinza. "Beno kele Nsemo ya yinza," kasi kana Yawu kele ya kubumbama na kitunga ya ba-denomination, wapi mutindu bawu ke mona Yawu? Samu na binkulu ya beno, beno ke sala ti Nsemo kusala kisalu ve! Na kumekaka... Beno bantu ya denomination, na kumekaka na kubumba Nsemo ntama na dibuundi ya beno; beno ke kota ve, to dyaka beno ke bika yawu. Amen.

²⁷² Beto telama kaka. Oh, mu kele na mingi awa. Beto—beto lenda landila... Oh, la la! Baminuti tanu beto kele na yawu.

²⁷³ Beno me mona nani Kyelo kele? Wapi kisika Nzambi tulaka Nkumbu ya Yandi? Na kati ya Yesu. Wapi mutindu beno ke kota na Nkumbu ya Yandi? Wapi mutindu beno ke kota kuna? Na kuvwandaka ya kubotika na kati kuna! Wapi mutindu? Na nzila ya maza? Na nzila ya Mpeve! "Mfumu mosi, lukwikilu mosi, imbotika mosi." Ya kele imbotika ya Mpeve-Santu.

²⁷⁴ Mbotika ya maza me tula kaka beno na kati ya kubundana na bantu, ti beno me zaba ti beno me ndima Klisto. Ya kele Kieleka. Kasi ya kele imbotika ya Mpeve. Mu lenda bokila Nkumbu ya Yesu na zulu ya beno mpe kubotika beno, yina ke sala yawu ve mutindu yina.

²⁷⁵ Kasi ntangu mbala mosi Mpeve-Santu yina ya kieleka... Ndinga ya kieleka ke kwiza na kati ya beno (Ndinga, Yesu), na yina, mpangi, Nsangu kele ve kinsweki samu na beno kuna; beno zaba Yawu, mpangi-bakala, Ya kele nyonso yina ke pela na ntwala ya beno. Alleluia! Lukumu na Nzambi! Amen!

Mu zola Yandi, mu zola Yandi
Samu Yandi zolaka munu ntete
Mpe futaka mpulusu ya munu...

Nzambi ya luzolo, mu ke sambila ti Nge belusa bantu yayi, Mfumu, mpe kumisa mosi na mosi ya bawu mbote. Na Nkumbu ya Yesu Klisto. Amen.

²⁷⁶ Oh! Zola! Oh!

Kubanda ntangu yina, na lukwikilu mu
monaka yinto yina
Yinto yina ke basika na bamputa ya Nge, (Na
Kisalu yina ya kulunga.)
Zola ya mpulusu me vvanda yintu ya munu,

²⁷⁷ Wapi mutindu beno lenda...? Nzambi kele Zola. "Yandi yina ke zolaka kele ya Nzambi," zola ya Kinzambi, zola ya santu, zola ya mvindu ve; ya kutsyema, ya kuvedila, zola ya santu, zola ya Nzambi Ndinga. "Misiku ya nge me bumba munu na kati ya ntima ya munu, ti mu ke sumuka ve na zulu ya Nge," oh, la la, ti David bokaka. Yandi kele ve mbote? Beno zola Yandi ve?

²⁷⁸ Ntangu yayi, ya kele na Nzila mosi, Nzila ya kuvedila, ya santu, kisika kaka ya kukutana yina Nzambi ke kutana na beno. Ve samu ti beno ke tuba, "Nzambi, ntangu yayi, mu

kele Methodiste ya mbote. Mu kele Baptiste ya mbote. Mu kele Pentecotiste ya mbote.” Ve! Samu ti beno kele na kati ya Yesu Ndinga, kitini ya Ndinga yina me monisama bubu yayi, Nsangu ya kilumbu *yayi*; ve ya Luther, ya Wesley, ya Pentecote; kasi Yesu ya beno, kutalisama, yina me kota na *yayi*. Beno lenda vutuka ve na *yawu*, yina ke na kubwelaka levire Dimpala ya beno ya santu, ti, “Muntu ke zinga na nzila ya konso Ndinga yina ke basika na yinwa ya Nzambi, na nsungi ya *yawu*.”

²⁷⁹ O kwiza, Mfumu Yesu, Ditadi ya yintu ya nene. Beno tala ya kulala kuna, putulu ya ba-Lutherien yina kufwaka ntama kuna na yisi ya bambangi; beno tala ba-Methodiste yayi.

²⁸⁰ Ba-Pentecotiste yayi mpe nionso, yina ke na kwisa ntangu yayi, dikanda ya kieleka yina basikaka.

²⁸¹ Beno ba-Assemblée de Dieu kwendaka mpe bongisaka, ntangu kima ya kieleka Nzambi basisaka beno, beno me vutuka mbala mosi mutindu ngulu na poto-poto ya yandi.

²⁸² Beno ba-Unitaire, ba-Unitaire, ba-J.C. ya ntama ya . . . ba-Pentecotiste ya Assemblée ya Yesu Klisto. Mosi samu na bantu ya ndombe, mpe kukabukaka beno mosi samu na nkabwani na nkabwani na bandombe. Beno yina salaka *yawu*, mpe na manima beno me vukana beno mosi mpe beno ke bokila *yawu* “Kuvukana.” Mpe na manima kubongisa, mpe swanaka na ba-Assemblée: “Mutindu yimbwa ke vutuka na biluki ya yandi.” Kana kuluka me sala yimbwa kubela na mbala ya ntete, ya ke sala yandi kubela dyaka ve? Beno soba madya ya beno na denomination ya beno na Ndinga, mpe beno zinga na Klisto. Nsoni na beno!

Mu kele na Tata na zulu kuna,
 Mu kele na Tata na zulu kuna,
 Mu kele na Tata na zulu kuna,
 Na Simu yankaka.

Kilumbu mosi ya nsemo mu ke kwenda mpe ke
 mona Yandi,
 Kilumbu mosi ya nsemo . . . beno kwenda mpe
 beno mona Yandi,
 Kilumbu mosi ya nsemo mu ke kwenda mpe ke
 mona Yandi,
 Na Simu yankaka.

Oh, ya ke vwanda ve lukutakanu ya kiese!
 Yina ve . . . (Ndinga ke kwendaka na
 Ndinga!) . . . lukutakanu!
 (Ntangu Kento ya makwela ke mata, Ndinga na
 nzila ya Ndinga.) . . . lukutakanu ya kiese!
 Na Simu yankaka.

Oh, mbasi lendaka vwanda kilumbu yina,
 Mbasi lenda vwanda kilumbu yango,
 Mbasi lenda vwanda kilumbu yango,

Na Simu yankaka.

²⁸³ Beno ke tuba, “Nge zola kutuba yawu, Mpangi Branham?”

²⁸⁴ Yinga, tata! Ntangu ba-Luthérien ya nsungi yina, nsungi ya bawu ya Wesley, ba-pentecotiste ya nsungi ya bawu (bantu ya kieleka, ba-denomination ve); ba-Pentecotiste, yina bwelaka levire (denomination ya bawu), kufwaka. Kasi Ndinga yayi ya kieleka ke landila na kukwenda, beno me mona. Kaka mutindu Yesu tubaka, “Na kilumbu yina, beno ke zaba ti Mu kele na kati ya Tata mpe Tata kele na kati ya Munu, mpe munu na kati ya beno mpe beno na kati ya Munu.” Ya kele nyonso Ndinga!

Oh, yina ke vwanda ve lukutakanu ya kiese!

(Ntangu bana ya Yandi ke vukana na mwelo
ya Yandi.)

...lukutakanu ya kiese!

Ya ke vwanda ve lukutakanu ya kiese!

Na Simu yankaka.

²⁸⁵ Ntangu yayi, dibuundu, beto ke na kulongaka ntangu yayi. Kasi, beno bambuka moyo, ntangu beno ke katuka awa, beno banda na kubasika na mpusu ntangu yayi; beno ke kota na mbuma, kasi beno vwanda na Mvwandulu ya Mwana. Beno bwela ve, yina mu me tuba; beno katula ve, yina mu me tuba. Samu ti, mu ke zonza Kieleka landila mutindu mu zaba Yawu, mutindu Tata me pesa munu. Beno me mona? Beno bwela na Yawu ve, beno tuba kaka yina mu tubaka.

²⁸⁶ Kima ya yawu kele, beno tuba kaka na bantu na kwiza kusosa Mfumu Yesu. Mpe na yina beno ke kukipesa beno mosi na Mvwandulu ya Yandi, beno sala kaka zola ya Yandi, “O Mfumu Yesu, Mwana ya Nzambi, mu zola Nge. Pesa ngolo na ntima ya munu, Mfumu. Katula mvindu nyonso mpe zola ya yinza, mpe ti mu zinga ya santu na yinza yayi na ntwala ya Nge.”

²⁸⁷ Beto ke kulumusa bayintu ya beto samu na kisambu. Ntangu yayi, beto mona, beto kele na muntu yina ba me sola samu na kusukisa na kisambu? To, mu ke, kuna. Beno vwanda kieleka na luzitu.

²⁸⁸ Nzambi ya luzolo, beto ke tonda Nge ti beto me kuzwa madya ya beto ya kimpeve. Beto ke tonda Nge, Mfumu, ti vitamine ya Ndinga ke na kukulisa bana ya Nzambi. Ya ke sala yimbi ve na mutindu yankaka ya nkadulu, kaka na zulu ya bana-babakala mpe bana-bakento ya Nzambi. Na yawu beto ke tonda Nge samu na Yawu. Mpe beto ke sambil, Nzambi, ti beto ke tala kuna, ti beto ke tonda kaka Nge ve. Beto ke tonda Nge samu na Yawu, kasi bika ti beto sadila ngolo ya kumeka na (na nzila ya Zola) bantu yina ke ndimisa bantu na kukwikila na Nzambi ya beto; na lweka, misumuki, bakento, babakala, bana ya babakala, bana ya bakento, na nsungi yayi.

²⁸⁹ Na kumonaka, Mfumu, ti mutindu ya kimbevo ya yintu, nsungi ya kidi-kidi yina bantu ke na kuzingila, ya ke na kunata

bawu na ngaanda ya mabanza ya bawu; samu na kulungisa yina Masonuku me tuba mpe silaka, bima ya nene ya boma ke kwiza na zulu ya ntoto; mutindu bampasu, samu na kukwamisa bakento yina zengaka bansuki ya bawu, bawu ke kuzwa nsuki ya yinda mutindu kento. Mpe bima yayi ya kuswaswana ya boma yina ba lendaka mona, Mfumu, na kati ya kimbevo ya yintu na kati ya ba konditsyo yina bawu kele kuna, mpe na yina ba ke boka na matadi mpe miongo. Bakento yina ke pesa zola ya mama na bayimbwa mpe baniawu, bawu ke zola ve kusansa bana samu na lukumu ya Nge. Bayina Nge pesaka bana na bawu mpe bawu kuzwaka kivumu ya bawu, bika bawu na babala-bala na kusala mutindu bawu zola. Kuyituka ve ti Nge tubaka, Mfumu, ntangu Nge ke kwenda na kulunsi, “Na manima bawu ke banda na kudila matadi mpe myongo kubwa na zulu ya bawu.”

²⁹⁰ Beto ke mona kima nyonso yankaka kutambula kaka tii na ntangu yayi. Beto ke mona Masonuku kusiamisama, kutalisama. Mpe kaka mutindu beto ke mona Yawu, Mfumu, Nge, na meso ya beto mosi, kumonisama, kilumbu mosi ya ke vwanda na Enlevement mpe beto ke mona kumonisama ya Ndinga yina, “Samu ti Mwana ya muntu ke kwiza na matuti ya nkembo, na Bawanzio ya Yandi ya santu na Yandi, mpe ba ke zangula beto na kukutana na Yandi na mipepe.” Ya ke na yina... Beto ke kuwa yawu ntangu yayi, na yina beto ke mona yawu na disu ya beto mosi.

²⁹¹ Bika ti beto vwanda na kati ya Yandi, Mfumu, kisika kaka ba me kubika. Mpe Yandi kele Munkayulu. Beto ke nata Yandi, yina beto me kuwa, Yesu Klisto, na yinzo ya Nzambi na nzila ya mbotika ya Mpeve-Santu, na nzila ya Nkumbu ya Yesu Klisto. Mpe Munkayulu ya beto me ndimama mpe ba me nata beto na dibuta yango; samu ti, kasi kubasika na yinza, ba tumaka beto bana ya babakala mpe bana ya bakento ya Nzambi ntete mbandukulu ya yinza. Matondo na Nge samu na yawu, Tata. Oh, wapi mutindu muntu lendaka vutuka na kima ya mutindu yina, ntangu bawu monaka Kieleka, ti Nzambi soolaka bawu na yinza? Ya vwandaka na mafuku yina zimbanaka, kilumbu yina mu kuzwaka mpulusu.

²⁹² O Mwana-dimeme yina ke na kufwa, wapi mutindu mu lenda tonda Nge? Wapi mutindu ntima ya munu lenda vwanda na luzitu mingi na ntwala ya Nge? Sadisa munu, Nzambi ya luzolo, samu na kuzinga kieleka. Sadisa bantu ya munu na kuzinga kieleka. Mu ke sambila samu na bawu, Mfumu, konso muntu, ti Nge zola, Nzambi, na mutindu nyonso, mu ve... Mu ke zaba ve mutindu... Mu zaba ve mutindu, kaka mutindu ya kulomba, Mfumu; mpe mu banza ti mu ke lomba yawu ve na mutindu ya kulunga. Kasi Nge ke lemvokila kukondwa kuzaba ya munu, Mfumu, mpe tala kaka ntima ya munu. Mu ke sambila ti mosi ve ya bawu kuzimbana, ata mosi ya bawu ve, Tata. Mu ke lomba bawu, bawu nionso, samu na Nge. Na Nkumbu ya Yesu

Klisto. Amen.

Mu zola Yandi, mu . . .

Mpe kana beno zola Yandi, beno zola mosi na yankaka. Beno
pesana mbote mosi na yankaka.



KISIKA MOSI KAKA YA KUSAMBILA YINA NZAMBI ME PESA KNG65-1128M
(God's Only Provided Place Of Worship)

Nsangu yayi ya Mpangi William Marrion Branham, kulongamaka na Kingelesi, na Lumingu na suka, na kilumbu ya 28 ya Ngonda ya kumi na mosi, na Life Tabernacle na Shreveport, na Louisiane, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo-Kituba basisamaka na buku mpe ba kabulaka yawu na Voice Of God Recordings.

KIKONGO-KITUBA

©2024 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kisadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org